

四庫全書

子部

欽定四庫全書

子部  
玉海卷九十八

詳校官中書臣張經田

主事臣祁韻士覆勘

總校官進士臣朱鈐

校對官中書臣方維甸

謄錄監生臣鄧肇槐

欽定四庫全書

玉海卷九十八

郊祀

封禪

索宏曰夫揖遜受終必有至德於天下征伐革命則有大功於萬物是故王者初基則有封禪之事以其成功告於神明者也夫東方者萬物之所始山嶽者

宋

王應麟 撰

靈氣之所宅故求之物本必於其始取其所通必於其宅崇其壇場則謂之封明其代興則謂之禪然則封禪者王者開務之大基也德不周洽不得擅議斯事功不弘濟不得髣髴斯禮曠代一有其道至高故自黃帝堯舜至三代各一得封禪未有中修其禮者也夫神道貞一其用不煩天地易簡其禮尚質故藉用白茅貴其誠素器用陶匏取其易從然封禪之禮簡易可也若夫白函玉牒非天地之性也 文中子

曰封禪之費非古也徒以夸天下其秦漢之侈心乎

伏羲黃帝封泰山

管子齊桓公既霸會諸侯於葵丘欲封禪管仲曰古者封泰山禪梁父者七十有二家而夷吾所記者十有二

焉昔無懷氏封泰山禪云云

鄭氏曰無懷氏古之王者在伏羲前見莊子服虔曰

云云在梁父東山名也晉灼曰山在蒙陰縣故城東北下有云云亭

虞羲封泰山禪云云

神農封泰山禪云云炎帝封泰山禪云云

李奇曰炎帝神農後愚

按神農即炎帝也分爲二妄矣

黃帝封泰山禪亭亭

服虔曰山在牟陰晉灼曰地理志鉅

平有亭 亭山祠 顓頊封泰山禪云云帝喾 封泰山禪云云堯

封泰山禪云云舜封泰山禪云云禹封泰山禪會稽湯

封泰山禪云云周成王封泰山禪於社首

山名在鉅平南十二里

大戴禮云成王封泰山禪梁父

皆受命然後得封禪古之封禪鄒上黍

北里禾所以為盛江淮之間一茅三脊所以為藉東海

致比目之魚西海致比翼之鳥物有不召自至者十有

五

比目魚謂之鱈比翼鳥謂之鵲

禮記注引孝經說曰封乎泰山考

績燔燎禪乎梁甫刻石紀號 禮記疏引白虎通孔子

曰三皇禪於繹繹之山五帝禪於亭亭之山三王禪於梁甫之山梁許懋謂燧人之前世質民淳安得泥金檢玉結繩而治安得鐫文告成

### 黃帝封東泰山

漢郊祀志太初三年公王帶曰黃帝時雖封泰山然風

后封鉅岐伯令黃帝封東泰山

在琅邪朱虛界有小泰山

禪几山

在朱

虛合符

天子既令設祠具東泰山卑小令祠官禮之不封其後令帶奉祠候神物復還泰山修五年之

禮

黃帝山川封禪

見羣祀類

周成王封泰山

又見上

漢郊祀志周成王封泰山禪於社首注應邵曰山名在博縣晉灼曰在鉅平南十二里師古曰晉說是也 大戴禮成王封泰山禪梁父 詩時邁巡守告祭柴望也箋巡行邦國至於方岳之下而封

禪武王



漢武帝封泰山 封禪儀 增修封禪

禮中祇

靈星祠

禮肅然

禮石閭

玉牒

封禪議對

紀元封元年冬上巡朔方歸甘泉春正月幸緱氏遂東  
巡海上夏四月癸卯還登封泰山降坐明堂詔曰朕以  
眇身承至尊兢兢焉惟德非薄不明于禮樂故用事八  
神遭天地况施著見景象肩然如有聞聞呼萬歲震于珍物  
欲止不敢遂登封泰山至于梁父然後升禮肅然山自名  
新嘉與士大夫更始其以十月為元封元年行所巡至

博奉高蛇丘歷城梁父民田租逋賦貸已除加年七十  
以上孤寡帛人二匹四縣毋出今年筭賜天下民爵一  
級女子百户牛酒注孟康曰王者功成治定告成功於  
天封崇也助天之高也刻石紀號有金策石函金泥玉  
檢之封焉應劭曰封者壇廣十二丈高二丈階三等封  
於其上示增高也刻石紀績也立石三丈一作二丈一尺其  
詞曰後志注引風俗通云事天以禮立身以義事親以孝育民以  
仁四守之內莫不郡縣四夷八蠻咸來貢職與天無極

人民蕃息天祿永得尚玄酒而俎生魚下禪梁父祀地

主示增廣此古制也武帝封廣丈二尺高九尺其下有

滕書秘語

郊祀志其來年冬

元鼎六年冬

上議曰古者先

振兵釋旅然後封禪迺遂北巡朔方勒兵十餘萬騎還

祭黃帝橋山釋兵涼如

地名

上曰吾聞黃帝不死有冢何

也或曰黃帝以仙上天羣臣葬其衣冠既至甘泉為且

用事泰山先類祠泰一

師古曰且將也類謂以事類而祭之

自得寶鼎上

與公卿諸生議封禪封禪用希曠絕莫知其儀體而羣

儒采封禪尚書周官王制之望祀射牛事齊人丁公年九十餘曰封禪者古不死之名也秦始皇不得上封陛下必欲上稍上即無風雨遂上封矣上於是迺令諸儒習射牛草封禪儀

索隱曰見應劭漢官儀

天子既聞公孫卿及方

士之言黃帝以上封禪皆致怪物與神通欲放黃帝以接神人蓬萊高世比德於九皇而頗采儒術以文之羣儒既已不能辨明封禪事又拘於詩書古文而不敢騁上為封禪祠器示羣儒或曰不與古同徐偃又曰太常

諸生行禮不如魯善周霸屬國封事於是上默偃霸而

盡罷諸儒弗用二月迺東幸緱氏

按武紀元封元年春正月行幸緱氏詔曰

朕用事華山至於中嶽

禮登中嶽太室從官在山上聞若有言萬

歲云問上上不言問下下不言於是以三百戶封太室

奉祠命曰密高禁毋伐其山木上因東上泰山泰山草

木未生迺令人上石立之泰山顛遂東巡海上禮祠八

神齊人之上疏言神怪奇方者以萬數迺益發舩令言

海中神仙者數千人求蓬萊神人公孫卿持節常先行

侯名山至東萊言夜見大人長數丈羣臣有言見一老

父牽狗言吾欲見鉅公

鄭氏曰天子也為天下父故曰鉅公師古曰鉅大也

已忽

不見上既見大迹未信及羣臣又言老父則大以為仙人也宿留海上與方士傳車及間使人求神仙以千數四月還至奉高上念諸儒及方士言封禪人人殊不經難施行天子至梁父禮祠地主至乙卯令侍中儒者皮弁縉紳射牛行事封泰山下東方如郊祠泰一禮封廣大二尺高九尺其下則玉牒書書秘禮畢天子獨與侍

中奉車子侯上泰山

子侯霍去病子也

亦有封其事皆禁明日

下陰道丙辰禪泰山下趾東北肅然山如祭后土禮天子皆親拜見衣上黃而盡用樂焉江淮間一茅三脊為神藉五色土益雜封縱遠方奇獸飛禽及白雉諸物頗以加祠兕牛象犀之屬不用皆至泰山然後去封禪祠其夜若有光晝有白雲出封中天子從禪還坐明堂羣臣更上壽下詔改元元封元年語在武紀又曰古者天子五載一巡狩用事泰山諸侯有朝宿地其令諸侯各

治邸泰山下天子既已封泰山無風雨其秋有星孛于東井後十餘日有星孛于三能望氣王朔言候獨見填星出如爪食頃復入有司皆曰陛下建漢家封禪天其

報德星云元封三年夏旱

據改元後又有來年冬郊如是則舉乾封事合見三年當

攷公孫卿曰黃帝時封則天旱乾封三年

言三歲不雨暴所封之上

令乾也

上乃下詔天旱意乾封乎其令天下尊祠靈星五

年四月至奉高修封焉詔曰朕巡荆揚輯江淮物會大

海氣呂合泰山上天見象增修封禪

紀云春二月還至泰山增封夏四月



詔曰太初元年冬十月行幸泰山十二月甲子朔旦冬  
云云

至祀上帝於明堂後每修封其贊饗曰天增授皇帝泰

元神策周而復始皇帝敬拜泰一十二月甲午朔上親

禮

禮禪同

高里云云其後復還泰山脩五年之禮如前而

加禪祠石閭石閭者在泰山下趾南方方士言僊人間

也

紀太初三年四月還脩封泰山禪石閭

其後五年復至泰山脩封

紀天漢三

年三月脩封

還過祭常山自封泰山後十三歲而周徧於五

嶽四瀆矣後五年復至泰山脩封東幸琅邪禮日成山

登之罘浮大海用事八神延年又祠神人於交門宮若

有鄉坐拜者云

紀云大始三年二月幸琅邪禮日成山登之罘浮大海四年三月行幸泰山甲

申修封丙戌禮石間四月後五年上復脩封于泰山東

幸不其祠神人于交門宮

紀征和四年正月行幸東萊臨大海三月還幸泰山脩封癸巳禮石間泰

山五年一脩封武帝凡五脩封 兒寬傳上欲議倣古

巡狩封禪事諸儒對者五十餘人未能有所定先是司

馬相如病死有遺書頌功德言符瑞足以封泰山上奇

其書以問寬對曰享薦之義不著於經以為封禪告成

合祛天地神祇戒精專以接神明總百官之職各稱  
事宜為之節文惟聖王所由制定其當非羣臣之所能  
列今將舉大事優游數年使羣臣得人人自盡終莫能  
成惟天子建中和之極兼總條貫金聲而玉振之以順  
成天慶垂萬世之基上然之乃自制儀采儒術以文焉  
既成將用事拜寬為御史大夫從東封泰山還登明堂  
寬上壽曰三代改制屬象相因間者聖統廢絕陛下發  
憤合指天地祖立明堂辟雍宗祀泰一六律五聲幽贊

聖意神樂四合各有方象以承嘉祀為萬世則天下幸甚將建太元本瑞登告岱宗發祉闔門以候景至癸亥宗祀日宜重光上元甲子肅雝永享光輝充塞天文粲然見象日昭報降符應臣寬奉觴再拜上千萬歲壽制

曰敬舉君之觴

太平之世日抱重光謂日有重日也將甫始之辭也太元初歷也本瑞謂白麟

寶鼎之屬也以候景至冬至之景也上元甲子太初元年甲子朔旦冬至也

司馬相如傳

其遺札言封禪事所忠奏馬天子異之相如既卒五歲上始祭后土八年遂禮中岳封于泰山至梁父禪肅然

東方朔傳朔之文辭有封泰山篇 藝文志禮家有

封禪議對十九篇

武帝時

漢封禪羣祀三十六篇古封禪

羣祀二十二篇小說家有封禪方說十八篇

武帝時

風

俗通岱宗上有金匱玉策能知人年壽脩短漢武帝探

策得十八因倒讀曰八十果壽長八十 後漢志東萊

黃縣注地道記曰東二百三十里有始皇漢武帝二碑

漢禮登中嶽 太室祠

紀元封元年春正月幸緱氏詔曰用事華山至于中嶽

獲駭麋見夏后啓母石翌日親登崇高御史乘屬在廟  
旁吏卒咸聞呼萬歲者三登禮罔不答其令祠官加增  
太室祠禁無伐其草木呂山下戶三百為之奉邑名曰

崇高獨給祠

鄧祀志二月東幸緱氏禮登中嶽太室

地理志潁川崇高

武帝置以奉太室山是為中嶽有太室少室山廟

古文以為

外方山

後紀永平六年十二月幸陽城遣使者祠中岳

熹平五年四月復崇高山名為嵩高山

東觀記靈帝使中郎將堂谿典

請雨因上言改崇高山為嵩高

魏明帝太和四年八月辛巳以特牛

祠中嶽 括地志嵩山亦名太室在洛州陽城縣西北  
二十三里 嵩高山記山高二千八百丈周迴七十五  
里

漢武封禪

史記正義伍緝之征記曰漢武封壇廣丈三尺高丈尺  
下有玉錄書以金銀為鏤封以璽

漢建武封泰山 柴望岱宗 元封舊儀 刻

石文 玉牒 河雒圖記

紀中元元年

柔兆執徐之歲

春正月丁卯東巡狩二月己卯幸

魯進幸太山北海王興齊王石朝于東嶽辛卯柴望岱

宗登封太山甲午禪于梁父

注封謂聚土為壇禪謂除地而祭續漢志曰時上御

輦升山即位於壇南北面尚書令奉玉牒檢皇帝以寸三分壘親封之藏玉牒已復石覆訖尚書令以五寸印

封石檢畢皇帝再拜禪祭地于梁陰以高后配羣神從祀焉

四月癸酉車駕還宮已

卯大赦天下復羸博梁父奉高勿出今年租田芻藁改

年為中元 志建武三十年二月羣臣上言宜封禪泰

山詔書曰即位三十年百姓怨氣滿腹何事汙七十二



代之編錄不許三十二年正月上齋夜讀河圖會昌符  
曰赤劉之九會命岱宗不慎克用何益於承誠善用之  
姦偽不萌感此文乃詔中郎將梁松等復案索河雒讖

文言九世封禪事者松等列奏乃許焉

注東觀書曰有司奏河雒圖記

凡三十六事與博士充等議請親定刻石紀號文太常奏儀

乃求元封時封禪故事

議所施用有司奏當方石再累置壇中皆方五尺厚一  
尺用玉牒書藏方石牒厚五寸長尺三寸廣五寸有玉  
檢又用石檢十枚列於石旁東西各三南北各二皆長

三尺廣一尺厚七寸檢中刻三處深四寸方五寸有蓋  
檢用金鏤五周以水銀和金以為泥玉璽一方寸二分  
一枚方五寸方石四角又有距石皆再累枚長一尺厚  
一尺廣二尺皆在圓壇上其下用距石十八枚皆高三  
尺厚一尺廣二尺如小碑環壇立之去壇三步距石下  
皆有石跗入地四尺又用石碑高九尺廣三尺五寸厚  
尺二寸立壇丙地去壇三丈以上以刻書上以用石功  
難又欲及二月封故詔松欲因故封石空檢更封而已

松上疏爭之以為登封之禮告功皇天垂後無窮以為  
萬民也承天之欽尤宜章明奉圖書之瑞尤宜顯著今  
因舊封竄寄玉牒故石下恐非重命之義受命中興宜  
當特異以明天意遂使泰山郡及魯趣石工宜取完青  
石無必五色以印工不能刻玉牒故用丹漆書之會求  
得能刻玉者遂書秘刻方石中合容玉牒二月上至奉

高

注應邵漢官馬第伯封禪儀記曰車駕正月二十八日發雒陽宮二月九日到魯十日魯遣宗室諸劉及

孔氏瑕丘丁氏上壽十一日發十二日宿奉高十五日始齋泰山上石二枚狀博平圓九尺此壇上石也其一

石武帝時用五車不能上因置山下為屋號五車石云云十九日車駕之山雲氣成宮闕百官並見之二十一日夕牲時白遣侍御史與蘭臺令史將工先上山刻石雲廣一丈

文曰維建武三十有二年二月皇帝東巡狩至于岱宗柴望秩于山川班于羣神遂覲東后從臣太尉熹行司徒事特進高密侯禹等漢賓二王之後在位孔子之後褒成侯序在東后蕃王十二咸來助祭河圖赤伏符曰劉秀發兵捕不道四夷雲集龍鬬野四七之際火為主河圖會昌符曰赤帝九世巡省得中治平則封成合帝

道孔矩則天文靈出地祇瑞興帝劉之九會命岱宗誠  
善用之姦偽不萌赤漢德興九世會昌巡岱皆當天地  
扶九崇經之常漢大興之道在九世之王封于太山刻  
石著記禪于梁父退省考五河圖合古篇曰帝劉之秀  
九名之世帝行德封刻政河圖提劉子曰九世帝方明  
聖持衡拒九州平天下雒書甄曜度曰赤三德昌九世  
會修符合帝際勉刻封孝經鉤命決曰子誰行赤劉用  
帝三建孝九會修專茲竭行封岱清河雒命后經識所

傳昔在帝堯聰明密微遜與舜庶後裔握機王莽以舅  
后之家三司鼎足冢宰之權勢依托周公霍光輔幼歸  
政之義遂以篡叛僭號自立宗廟隳壞社稷喪亡不得  
血食十有八年揚徐青三州首亂兵革橫行延及荊州  
豪傑并兼百里屯聚往往僭號北夷作寇千里無煙無  
雞鳴犬吠之聲皇天睠顧皇帝以匹庶受命中興年二  
十八載興兵起是以中次誅討十有餘年罪人則斯得  
黎庶得居爾田安爾宅書同文車同軌人同倫舟輿所

通人迹所至靡不貢職建明堂立辟雍起靈臺設庠序  
同律度量衡修五禮五玉三帛二牲一死貶吏各修職  
復于舊典在位三十有二年年六十二乾乾日昃不敢  
荒寧涉危歷險親巡黎元恭肅神祇惠恤耆老理庶遵  
古聰允明恕皇帝惟慎河圖洛書正文是月辛卯柴登  
封泰山甲午禪于梁陰以承靈瑞以為兆民永茲一宇  
垂于後昆百寮從臣郡守師尹咸蒙祉福永永無極秦  
相李斯燔詩書樂崩禮壞建武元年己前文書散亡舊

典不具不能明經文以章句細微相況八十一卷明者

為驗又其十卷皆不昭晷後有聖人正失誤刻石記

班固

典引曰作者七十有四人注古封禪七十二君加以二漢

二十二日辛卯晨燎祭天

於泰山下南方羣神皆從用樂如南郊諸王王者後二

公孔子後襲成君皆助祭事畢將升封或曰泰山雖已

從食於柴祭今親升告功宜有禮祭於是使謁者以一

牲牲於常祠泰山處告祠泰山如親耕疆劉先祠先農

先虞故事至食時御輦升山日出後到山上更衣早鋪



時即位于壇北面羣臣以次陳後西上畢位升壇

注虎賁陞

戟臺下

尚書令奉玉牒檢皇帝以寸二分璽親封之訖太

常命人發壇上石尚書令藏玉牒已復石覆訖尚書令

以五寸印封石檢

論衡曰光武升封天晏然無雲太平之應也

事畢皇帝再

拜羣臣稱萬歲

注音動山谷有氣屬天

命人立所刻石乃復道下

注封禪儀曰封畢明日上壽暮宿奉高三十里明日發至梁甫九十里夕牲

二十五日甲午

禪祭地于梁陰以高后配山川羣神從如元始中北郊

故事

注封禪儀曰功效如彼天應如此羣臣上壽國家不聽

四月己卯大赦天下

以建武三十二年為中元元年復博奉高麗勿出元年  
租芻藁以吉日刻玉牒書函藏金匱璽印封之乙酉使  
太尉行事以特告至高廟乃奉匱藏于廟室西壁石室  
高主室之下 張純傳建武三十年奏上宜封禪曰自

古受命而帝治世之隆必有封禪以告成功焉書曰歲  
二月東巡狩至于岱宗柴則封禪之義也陛下受中興  
之命平海內之亂黎元安寧夷狄慕義今攝提之歲蒼  
龍甲寅

太歲在寅曰攝提格建  
武三十年歲在甲寅

年德在東宮宜及嘉時

以二月東巡狩封于岱宗中元元年帝乃東巡岱宗以  
純視御史大夫從并上元封舊儀及刻石文 趙燾傳

建武三十年上言封禪正三雍之禮中元元年從封泰  
山 紀章帝元和二年二月辛未幸泰山柴告岱宗有

黃鵠三十從西南來經祠壇上東北過于宮屋安帝延

光三年二月辛卯幸太山柴告岱宗

志元和二年二月  
至泰山修光武山

南壇兆辛未柴祭天地羣神如故事  
延光三年上東巡狩至泰山柴祭如元和二年故事

魏明帝

使高堂隆草封禪儀卒不行 晉太康元年九月庚寅

衛瓘等奏封禪不許

漢封禪儀記

紀號石 泰山銅物  
日觀 玉盤 玉龜

後志注應劭漢官馬第伯封禪儀記曰建武三十二年  
車駕正月二十八日發雒陽宮二月九日到魯遣守謁  
者郭堅伯將徒五百人治泰山道十日魯遣宗室諸劉  
及孔氏瑕丘丁氏上壽受賜皆詣孔氏宅賜酒肉十二  
日宿奉高十五日始齋馬第伯自云某等七十人先之  
山虞觀祭山壇及故明堂宮觀治石石二枚狀博平圓

九尺此壇上石也其一石武帝時石也時用五車不能上因置山下為屋號五車石四維距石四枚檢石十枚紀號石高一丈二尺廣三尺厚尺二寸名曰立石一枚刻文字紀功德是朝上山晡後到天門郭使者得銅物銅物狀如鍾又方柄有孔莫能識疑封禪具也得之者汝南召陵人姓楊名通東上一里餘得木甲木甲者武帝時神也東北百餘步得封所秦始皇立石及闕在南方漢武在其北東山名曰日觀日觀者雖一鳴時見日

始欲出長三丈所秦觀望見長安吳觀望見會稽周觀望見齊西北有石室壇南有玉盤中有玉龜山南神泉飲之清美 郭璞注山海經曰泰山從山下至頭四十八里二百步 魏志太和中蔣濟上疏宜遵古封禪使高堂隆撰其禮儀 北史魏收傳試為封禪書下筆便就文將千言 梁書許懋傳時有請會稽封禪者武帝因集儒學士草封禪儀將行焉懋建議獨以為不可帝嘉納焉

隋封禪圖

隋書開皇九年平陳咸願登封七月丙午詔禁絕

紀 充

州刺史薛胄遣博士登泰山觀古跡撰封禪圖及儀上

之

傳

十四年百官固請命牛弘辛彥之等撰定儀注十

五年春幸兗州次岱嶽為壇如南郊服兗冕備法駕行

禮遂詣青帝壇而祭

志

未嘗升山也

唐志

唐貞觀封禪禮儀注

志太宗已平突厥年穀屢豐羣臣請封泰山太宗初頗

非之已而遣杜正倫行泰山上七十二君壇迹

會要貞觀初羣

臣屢請魏徵以為不可六年太宗問禮官兩漢封禪儀注遣杜正倫行泰山上至十一年始議封禪

乃命

顏師古魏徵等集名儒博士議於是房玄齡魏證楊師

道博采衆議奏之上其議曰為壇泰山下祀昊天上帝

玉牒玉檢玉策四已祀而歸格于廟盛以金匱繩以金

繩封以金泥印以受命璽而玉牒藏於山又為告至壇

以燔柴告至望秩羣神遂著于禮顏師古傳帝將有

事泰山詔公卿博士雜定其儀而論者爭為異端師古



奏臣撰封禪儀注書在十一年于時諸儒謂為適中於

是以付有司多從其說

會要十一年師古奏議曰今請祭於山下封於山上云云十三

年房玄齡等遂采師古之議附于新禮以為定式二十一年詔以來年有事泰山八月以河北大水而止

實錄貞觀五年正月朝集使趙郡王孝恭等請封禪手

詔不許十二月己亥朝集使表請帝曰未遑六年百僚

又請不許十一年帝將有事封禪國子博士劉伯莊等

皆上封禪事言新禮簡略勅名儒及顏師古朱子奢參

議得失議者數十家遞相駁難不決於是玄齡徵師道

采衆議以為永式十四年十月甲戌趙王元景等表請

壬辰詔從之

通鑑十四年十一月丙子百官表請許之更命諸儒詳定儀注

十五年三

月庚辰肅州言所部川原遍生芝草先是百僚及雍州

父老詣朝堂表請四月辛卯朔詔以來歲二月有事于

泰山

紀同

詔太常卿韋挺為檢校封禪大使禮部侍郎令

孤德榮副焉秘書少監顏師古奏臣撰禮書在十一年

春詔公卿定可否多從師古之禮六月己酉有星孛太

微宮辛亥起居郎褚遂良進曰行至洛陽彗星輒見或

有未允合者丙辰停封泰山

紀同

二十年十一月司徒無

忌等表請十二月己丑又請詔有司議方石園壇之制

草封禪射牛之禮脩造羽儀輦輅送洛陽宮二十一年

正月丁酉詔以二十二載仲春有事泰山司空玄齡等

議社首去泰山五里是周家禪處請禪社首八月壬戌

停謝偃傳貞觀間獻玉牒真紀勸登封藝文志令

狐德菜皇帝封禪儀六卷

儀注類

唐高宗封泰山封禪碑錄舞鶴萬歲景

雲臺

紀高宗麟德二年十月丁卯如泰山乾封元年

即麟德三年

正月戊辰封于泰山庚午禪于社首以皇后為亞獻壬

申大赦改元賜文武官勲爵民年八十以上版授下州

刺史司馬縣令婦人郡縣君七十以上至八十賜古爵

一級民酺七日免所過今年租賦給復齊州一年半充

州二年通鑑顯慶四年六月

會要二十四日

許敬宗議封禪

儀已已請以高祖太宗俱配昊天上帝太穆文德二后俱

配皇地祇麟德元年七月丁未朔詔以三年正月有事  
岱宗云云 會要乾封元年正月封禪禮畢上謂羣臣  
曰升中大禮不行數千年近代帝王雖稱封禪其間事  
實不同或為求仙克裡或以巡游望拜近隋朝喪亂高  
祖發跡晉陽撥亂反正先朝躬擐甲冑贊成大業朕丕  
承大厯十有七年躬親展禮褒贊先功情在歸功志非  
為己大禮既畢深以慰懷公等休戚是同故應共有此  
慶欲與公宴飲盡歡縱酒設樂羣臣及諸岳牧競來上

壽起舞日宴方止 禮志高宗乾封元年封泰山為圓

壇山南四里如圓丘三壇壇飾以青四方如其色號封

祀壇玉策三刻而金文玉匱一以藏上帝之冊金匱二

以藏配帝之冊纏以金繩五周金泥玉璽石礧

古禪反以

容玉匱礧纏以金繩五周封以石泥又為壇於山上廣

五丈高九尺四出陛一壇號登封壇玉牒玉檢石礧石

距玉匱石檢皆如之為降禪壇於社首山上八隅一成

八陛如方丘三壇上飾以黃四方如其色其餘皆如登

封其儀畧定

會要麟德二年十月十四日有司進儀注云

而天子詔曰古今

之制文質不同今禪以玉牒金繩而瓦尊匏爵秸席宜

改從文於是昊天上帝禱以蒼地祇禱以黃配禱皆以

紫而尊爵亦更焉是歲

正月戊辰朔

天子祀昊天上帝于山

下之封祀壇以高祖太宗配如圓丘之禮親封玉冊置

石礧聚五色土封之徑一丈二尺高尺已事升山明日

又封玉冊于登封壇

舊紀已巳帝升山行封禪之禮

又明日

庚午

祀皇地

祇于社首山之降禪壇如方丘之禮以太穆皇后文德

皇后配而皇后武氏為亞獻越國太妃燕氏為終獻率

六宮以登其帷帟皆錦繡羣臣瞻望多竊笑之又明日

御朝覲壇以朝羣臣如元日之禮

舊紀壬申御朝覲壇受朝賀改元大赦

乃詔立登封降禪朝覲之碑名封祀壇曰舞鶴臺登封

壇曰萬歲臺降禪壇曰景雲臺以紀瑞焉

舊紀癸酉燕羣臣陳九部

樂丙戌發泰山辛卯至曲阜贈孔子太師以少牢祭

車鼻可汗傳高宗既遣高

俣擒車鼻可汗裂其地為郡縣以酋長為都督刺史帝

封禪都督葛邏祿叱利等三十餘人皆從至泰山下已



封請勒名於封禪碑云

會要突厥于闐等十一蕃長扈從

高麗傳高

麗王高藏遣子男福從封泰山

流鬼傳有僭罪者麟

德中酋長來朝從封泰山

金石錄唐登封紀號文高

宗撰并行書飛白書額乾封元年二月

杜光庭靈驗

記天皇東封鶴集其壇使諸州為老氏築宮號以白鶴

唐開元封泰山

封禪儀注

東封記

圖

封禪壇頌

紀泰山銘

封禪錄

朝覲碑

頌 圓臺

方壇

玉牒

紀開元十三年

銘序曰宅帝位十有四載

十月辛酉如兗州庚午次

濮州賜河南北五百里內父老帛

十一月丙戌至泰山下丁亥於行宮致齋

十一月庚寅封于泰山辛卯禪于社首山壬辰大赦賜

文武官階勲爵諸蕃酋長來會者一官免兗州租二歲

賜天下酺七日

會要開元十二年閏十二月

辛酉

百

官上表請封岳手詔不從於是

甲子

侍中源乾曜中書

令張說上言曰自古受命居大寶者必登崇高丘行封

禪之禮高宗因文武之業盛岱亭之禮方策所記虞夏

同風陛下即位十有四載創九廟禮二郊睦九族友兄弟天平地成人和歲稔可以拜於神明矣從之

丁卯十

三年四月

乙丑

撫州三脊茅生八月

己未

詔張說徐堅

韋縚等於集賢院刊撰東封儀注十一月九日

己丑日

南至上備法駕登山十日

庚寅

祀昊天上帝于封臺之

前壇以神堯配享禮畢還齋宮慶雲隨馬祥風繞輅張

說等蹈舞拜賀十一日

辛卯

祀享地祇於社首之泰折

壇以睿宗配享初畢至岳西大風裂幕折柱張說昌言

海神來迎至升壇休氣四塞登歌奏樂有祥風自南而  
至絲竹之聲飄若天外及禪社首五色雲見日重輪十  
二日壬辰上御朝覲之帳殿朝羣臣大赦天下上製紀  
泰山銘親札勒於山頂之石中書令張說撰封祀壇頌  
侍中源乾曜撰禪社首壇頌禮部尚書蘇頌撰朝覲壇  
頌以紀聖德 禮樂志開元十二年四方治定歲屢豐  
稔羣臣多言封禪中書令張說又固請乃下制以十三  
年有事泰山於是說與徐堅韋縚康子元侯行果判定

儀注立圓臺於山上廣五丈高九尺土色各依其方又於圓臺上起方壇廣一丈二尺高九尺四面為一階又積柴為燎壇為圓壇於山下三成十三階如圓丘之制又為玉冊石匱石礧如高宗之制上問前代何為秘玉牒賀知章曰玉牒以通意於天前代或祈長年希神仙旨尚微密故外莫知帝曰朕今為民祈福無一秘請即

出玉牒示百僚

其辭曰有唐天子臣某敢昭告于昊天上帝天啟李氏運興土德高祖太宗受

命立極高宗升中六合殷盛中宗紹復繼體不定上帝眷佑錫臣忠武底綏內難推戴聖父恭承大寶十有三

年敬若天意四海晏然封祀岱岳  
謝成于天子孫百祿蒼生受福

乃祀昊天上帝於山

上壇以高祖配祀五帝以下諸神於山下其祀禮皆如  
圓丘大駕所經及告至問百年朝覲皆如巡狩之禮

列傳張說為中書令倡封禪議受詔與諸儒草儀及登  
封還詔說撰登封壇頌刻之泰山 蘇頌從封泰山頌

朝覲壇世咨其文 裴光庭玄宗有事岱宗中書令張  
說以天子東巡京師空虛恐夷狄乘間竊發議欲加兵  
守邊召光庭與謀曰封禪所以告成功也成功者德無

不被人無不安萬國無不懷今將告成而懼夷狄非昭  
德也大興力役用備不虞非安人也方謀會同而阻戎  
心非懷遠也此三者名實乖矣且諸蕃突厥為大贄幣  
往來願修和好若遣一使召大臣使赴行在必欣然應  
命突厥受詔則諸蕃君長必相率而來我偃旗息鼓不  
復事矣說曰善吾所不及因奏用其策突厥果遣使來  
朝 契丹天子封禪其酋長卻固與諸蕃長皆從行在  
韋述為起居舍人開元十三年從封泰山奏東封記

一 卷 詔褒美賜絹五十 劉晏玄宗封泰山晏始八歲獻

頌行在 李邕帝封泰山還見帝汴州詔獻辭賦 呂

向玄宗自為文勒石西嶽詔向為鐫勒使 梁昇卿工

八分書東封朝覲碑為時絕筆 會要開元十三年詔

康子元注解東封儀注以進 金石錄紀泰山銘明皇

撰并八分書開元十四年九月 通典載紀泰山銘曰

欽若祀典丕承永命至誠動天福我萬姓道在觀政名

非從欲銘心絕巖播告羣岳 張說頌曰泰山升中建



號惟七十而有五我高宗六之而今七矣天壇三襲辰  
陛十二咸秩衆靈列坐有次出天門臨日觀赤霄可接  
白雲在下 蘇頌頌曰十四年考虞氏歲巡之歲諷周

王時邁之什十月辛酉步自有洛十一月丙戌帳殿齋  
於岳趾云云 藝文志儀注類孟利貞封禪錄十卷裴  
守真神岳封禪儀注十卷韋述東封記一卷 劉禹錫

進開元東封圖表臣謹按開元十三年玄宗以天下太  
平登封東岳聲明文物振耀古今伏惟陛下丕承景光

再闡鴻業祖宗盛事紹復有期臣所以編成此圖輒敢  
上獻至於續畫躬自指揮證史氏之文纂禮容之要山  
川氣象悉擬真形羽衛威儀咸稽故實

劉禹錫為裴相  
公進東封圖狀

韓愈勸憲宗紀泰山之封鏤白玉之牒

祥符封禪 儀注 頌圖 記錄

含光殿大

宴 朝元殿受冊

太平興國九年四月甲午詔有事于泰山丙申定封禪

儀六月壬寅有詔寢罷大中祥符元年

舊編云  
二年

三月甲

成兗州父老詣闕上表請東封壬午文武百官宰臣王

旦等繼請時天書降左承天門

正月乙丑

四月甲午下詔以

今年十月有事於泰山乙未以王旦為大禮使王欽若

為禮儀使馮拯為儀仗使陳堯叟為鹵簿使趙安仁為

橋道頓遞使

建本謂乙未王欽若趙安仁為泰山封禪經度制置使實錄丙申命五使丁酉鑄

五使及計度制置使印

命翰林學士晁迥李宗諤楊億龍圖閣學

士杜鎬待制陳彭年與太常禮院詳定儀注丙午詔於

京城擇地依道教建宮以昭應為名辛亥太子中舍夏

侯晟上漢武帝封禪圖續金匱玉匱石碣石距之狀有  
注釋甲寅命宰臣王旦撰封祀壇頌王欽若撰社首壇  
頌陳堯叟撰朝覲壇頌五月乙亥太常丞王曉上前代  
封禪雜錄丁丑詳定所言封禪畢御朝覲壇諸州所貢  
方物陳列如元正之儀戊寅太常博士劉炳上封禪禮  
儀集辛巳對王旦等於龍圖閣出封禪壇圖示之丁亥  
翰林學士晁迥等上封祀社首壇樂章八首六月壬辰  
詳定所上封禪儀注上覽之曰此儀久廢非典禮具備

豈為盡美即手札疑互凡十七事令與五使參議釐正而行之壬子詳定所言准詔旨取封禪之義易樂章之名望改酌獻昊天上帝禋安之樂皇地祇禪安皇帝飲福祺安丁巳詳定所上封禪儀注四卷詔付有司八月甲辰令禮官晁迥以下習儀都亭驛八月己酉王欽若獻芝草召輔臣同閱之九月戊午朔岳州上三脊茅己未詔告太廟日以芝草嘉禾瑞木列于天書輦前及陳於六室庚申皇城使劉承珪詣便殿上新制天書法物

有鶴十四就舞於庭甲子扶侍使等奉天書升玉輅赴太廟幄殿車駕詣酌獻奠告六室是日有黃雲迎日若橋梁狀五色雲如錦錢惟演黃宗旦宋綬劉筠邵煥晏殊以靈瑞紛集咸上贊頌以美盛德庚辰趙安仁獻芝草乙酉上躬習封禪儀于崇德殿十月辛卯上御大輦發京師丁未備法駕入乾封縣奉高宮戊申上齋于穆清殿己酉五色雲覆嶽頂上與羣臣登嶽亭望之名亭

曰瑞雲

一本云有黃白雲如幢蓋龍鳳狀起太平頂命輔臣後亭焚香再拜雲變五色後有雲如橋梁

紫雲覆之久而不散遂名其亭

張知白請以泰山瑞繪圖秘府傳示不

朽王欽若等獻泰山芝草詔令封禪日列于天書輦前  
庚戌上服通天冠乘金輅備法駕至門幄次乘步輦以  
登天氣溫和纖塵不動辛亥享昊天上帝於山上圓臺  
奉太祖太宗並配命羣臣享五方帝諸神於山下封祀  
壇帝服玄袞升圜壇奠獻飲福攝中書令王旦跪稱天  
賜皇帝太一神冊周而復始永綏兆人三獻畢封金匱  
王旦置於石礧攝太尉馮拯奉金匱以降將作監領徒

封礪帝復登園臺閱視訖還御幄宰臣率從官稱賀上  
還御幄攝司天監王欽元跪奏慶雲繞壇月有黃輝于  
時星斗輝燦祥風肅然法駕降山百官奉迎傳呼萬歲  
震動山谷日有冠戴黃氣紛郁壬子禪祭皇地祇於社  
首奉天書升壇以太祖太宗配天寓澄霽紫氣蒙壇黃  
光如星繞天書匣封玉冊石礪並同封祀之禮法駕還  
奉高宮日重輪五色雲見鼓吹振作觀者塞路詔改上  
泰山奉高宮曰會真宮癸丑有司設仗衛宮懸于朝覲



壇下上被袞冕御壇上之壽昌殿受朝賀諸州貢奉使僧道父老蠻夷大會各陳方物于下御製慶成詩大赦

天下文武官遞進官勲

一本云二十六日癸丑宴百官于穆清殿又宴近臣及父老於

殿門賜父老茶帛時服明年五月戊午內出御製書登泰山謝天書述二聖功德銘示宰相命內侍賁付泰

山刻之

十一月戊午朔幸曲阜謁文宣王廟行酌獻之禮

親製賛令刻石廟中丁丑車駕至自泰山上御乾元樓

召近臣觀衛士甲馬還營乙酉大宴含光殿勞旋也十

二月辛卯御朝元殿受冊尊號壬辰龍圖待制陳彭年

請自天書降後至上尊號以前制敕章奏儀注特召臣  
寮二三人編錄丁酉內出泰山封祀上尊酒及玉女白  
龍王母池水新醴泉賜輔臣二年五月壬戌知兗州朱  
巽言泰山修封畢詔獎之園臺增高一丈五尺又增社  
首壇高一丈六尺並廣五十尺云七月丁卯王旦欽若  
上封祀社首壇頌甲戌陳堯叟上朝覲壇頌三年四月  
王旦等奉詔撰封禪頌成甲戌並加尚書又為大中祥  
符封禪記詔李宗諤丁謂戚綸與陳彭年撰錄

自天書  
降至脩

封畢

三年十月庚申書成凡五十卷帝自製序目錄二卷

藏秘閣賜謂等器幣晁迥而下獻賦頌歌詩以紀盛

德者三十四人王旦表云自唐室中微皇綱不振洎

四方之叛亂迨五代之陵夷盛德之事未遑振舉國家

接千載之統宅九州之中藝祖以揖遜開基太宗以文

明闡化允屬重熙之運茂宣善繼之猷漢武獲汾鼎

之瑞乃議升中世祖閱河圖之文是思紀號高宗以六

合金盛詔蹕時巡明皇以累年太平封巒展禮莫不以

懿文之業成神武之績著雅頌之聲作珍奇之貺集然  
後納羣臣率籲之請遵哲王順考之規 肆覲東后事  
載於虞書陟其高山美溢於周頌升中於天者經籍之  
攸紀勒功於嶽者八九之所同在昔哲王率循斯道昔  
西漢陳師鞠旅以事朔方之循而真宗再御戎衣五兵  
已戢東京垂精游神以俛元符之至而真宗親受乾文  
萬國咸規以天下未一為念則真宗之時際天所覆無  
不州縣矣以邊鄙未寧為念則真宗之時鼓卧戎亭燧

息烽火矣以歲靡豐穰為念則真宗之時民物富庶海  
內阜安八路連稔米斗至七八錢其可謂豐穰也以政  
猶堙鬱為念則真宗之時禮樂交修憲章大備建中和  
之極流懿鑠之義其可謂得宜也於是採夷吾之舊說  
詢相如之往議鳴鑾日觀按蹕魯郊陳金石以奏音執  
籩豆而享帝對越穹昊嚴配祖宗神光焜耀下燭於柴  
壇白雲紛綸上浮於玉檢 考園壇泰折之制陳五玉  
六器之容用事介丘告禪社首肆覲東后受計明堂

政和五年十一月李陞進登封告成錄一百卷

祥符封禪樂章

詳見樂舞類

元年四月戊戌詳定所言封禪用樂章八首命學士院撰五月丁亥晁迥上之六月丙午上奉天書入太廟升泰山園臺社首山登歌瑞文曲樂章二首壬子易樂章之名為封安禪安祺安十月甲午判太常李宗諤上園臺登歌亞終獻樂章二首太宗時田錫上封禪書謂宜崇檢玉之禮以答天意

祥符封禪朝覲壇圖 祥瑞圖 天書儀仗圖

二年十二月辛丑三司使丁謂翰林學士李宗諤等上  
泰山登封社首山降禪朝覲壇圖三祥瑞圖百五十二  
昭宣使劉承珪又上天書儀仗圖一列于滋福殿召宗  
室輔臣刺史以上觀焉三年正月丁丑內出封禪三壇  
及祥瑞圖於朝堂示百官從御史中丞王嗣宗之請也  
王欽若著五嶽廣聞記

漢武封禪圖

大中祥符初夏侯晟上漢武封禪圖績金匱玉匱石礪石距之狀咸有注釋上覽而善之 陳堯叟受詔撰朝

觀壇碑獻封禪聖製頌上作荅之 太宗時宋白知兗

州召還泰山有唐玄宗刻銘白摹本以獻且述承平東人望幸之意 公羊傳天子有事于泰山諸侯皆從泰

山之下諸侯皆有湯沐之邑焉注禮四井為邑邑方二里東方二州四百二十國凡為邑廣四十里袤四十二里取足舍止共橐穀而已 禮器因名山升中于天䟽



白虎通云增泰山之高以報天附梁甫之基以報地或  
曰封者金泥銀繩或曰石泥金繩封之印璽 馬第伯  
封禪儀記曰是朝上山仰望天關如從谷底仰觀抗峰  
其為高也如視浮雲其峻也石壁竇窳如無道徑遙望  
其人或為白石或雪久之乃知是人也仰視巖石松木  
鬱鬱蒼蒼若在雲中俛視谿谷碌碌不可見丈尺遂至  
天門之下仰視天門窅遼如從穴中視天 書正義韓詩  
外傳稱古封太山禪梁甫者萬餘人仲尼觀焉不能盡

識又管子書古之封太山者七十二家夷吾所識十二

而已其登封者皆刻石紀號

通典載晉太康郡國志秦立石頌德文

史

記正義道書福地記云泰山高四千九百丈二尺周迴

二千里括地志梁父山在兗州泗水縣北八十里西接

徂來山肅然山在博城縣東六十里晉太康地志云肅

然山太山趾東北名也 秦儒生議曰古者封禪為蒲

車掃地而祠席用苴稽 劉歆曰若立辟雍封禪之儀

則幽冥莫知其原 唐顏師古議昔在元封兒寬專輔

其決逮乎建武梁松獨尸其事措紳雜議不知所裁

隋志自古帝王之興皆稟五精之氣每易姓而起以致太平必封乎太山所以告成功也封訖而禪乎梁甫梁甫者太山之支山卑下者也能以其道配成高德故禪乎梁甫亦以告太平也封禪者高厚之謂也天以高為尊地以厚為德增太山之高以報天也厚梁甫之基以報地也明天之所命功成可就有益於天地若天地之更高厚云 唐志文中子曰封禪非古也其秦漢之侈心

乎蓋其曠世不常行而於禮無所本故自漢以來儒生  
學官論議不同而至於不能決則出於時君率意而行之  
爾 大舜巡岳顯乎虞典成康封禪聞之樂緯 易著  
觀民省方禮有升中于天詩頌陟其高山 鳴鑾日觀  
勒牒仙閣 容成諏日 乾冊丹篆河圖紫文 召萬  
玉以警途詔八神而弭策 詔蹕梁父張樂介丘 榮  
鏡六合對越三神

玉海卷九十八

欽定四庫全書

玉海卷九十九

宋 王應麟 撰

郊祀

社稷

孝經說曰社者土地之主稷者五穀之長土地廣博不可徧敬故封土以為社五穀衆多不可徧祭故立稷而祭之

詳具白虎通

鄭康成曰社為五土總神稷為原

隰之神古者以句龍有平水之功配社祀之稷有播種之功配稷祀之 三禮義宗王者諸侯所以為社為萬民求福拜功之道也無土不立無穀不生故立社稷則祭之春則求之秋則拜之故月令云仲春之月擇元日命民社孝經援神契云仲秋穰禾拜祭社稷祭日用甲牲用大牢夏用熟秋冬用牂

神農社

後漢郡國志注 見井類

虞社

管子輕重戊有虞之王封土為社置木為閭始民知禮也淮南子齊俗訓有虞氏之祀其社用土祀中霤夏后氏其社用松祀戶商人社用石祀門周人社用栗祀竈

湯稷祠

漢郊祀志湯欲遷夏社不可作夏社

見書序應劭曰大旱不止故遷社

迺遷烈山子柱以周棄代為稷祠祭法聖王之制祭

祀也法施於民則祀之以死勤事則祀之以勞定國則

祀之能禦大菑捍大患則祀之厲山氏

炎帝也

之有天下

也其子曰農能殖百穀夏之哀也周棄繼之故祀以為

稷

正義夏末湯遭大旱七年欲變置社稷故廢農祀棄

共工氏之伯九州也其子

曰后土能平九州故祀以為社王為羣姓立社曰大社

王自為立社曰王社諸侯為百姓立社曰國社諸侯自

為立社曰侯社大夫以下成羣立社曰置社書伊尹

曰先王承上下神祇社稷宗廟罔不祇肅論語宰我



曰社夏以松殷以栢周以栗

周社壇 三社 大社 軍社 五社

禮大司徒設其社稷之壇

后土及田正之神

植之田主

詩曰田祖

各以野

所宜木遂以名其社與野

宰我對社以松栢栗莊周之標社潁川之長社

小

司徒凡建國立社稷 封人設王之社壇為畿封而樹

之凡封國設其社稷之壇封其四疆

疏王之三社三稷之壇及壇外四邊

之 小宗伯建國之神位右社稷左宗廟

大宗伯以血祭祭社稷注

社稷土穀之神有德者配食焉

小子珥于社稷

州長歲時祭祀州社屬民讀法

鼓人以靈鼓社祭

大司樂奏大蕤歌應鍾舞咸池以祭地示注謂社稷牧人陰祀用黜牲注北郊及社

稷

匠人營

國左祖右社

詩綿乃立冢土注大社也起大事動大

衆先有事乎社謂之宜

泰誓曰宜于冢土

周書作雒諸侯受

命于周乃建大社于國中其壝東青土南赤西白北驪

中雷以黃

將建諸侯取方一面之土直以白茅以土封之

召誥戊午社于新

邑牛一羊一豕一

注告立社稷之位用大牢社稷共牢

詩載芟春藉田

而祈社稷也

良耜秋報社稷也

白虎通天子社稷

方五丈諸侯半之

通典顓頊祀共工氏子句龍為社

祭法曰后土為社

烈山氏子柱為稷祭法曰厲山氏炎帝也其子曰農

湯為旱

遷柱以周弃代之欲遷句龍無可繼者而止周制天子

立三社大社於庫門內之西立之王社於藉田立之亳

社廟門之門立之

五經通義大社在中門之外稷在西并壇王社在藉田之中在國者明天

下拜功在藉田者明千畝拜功

諸侯立三社國社侯社亳社

祭法無亳社大

夫以下立一社曰置社名異神同社者五土之神稷者五土

之中特指原隰之祇

天子社壇廣五丈以五色土諸侯以其方之色立木以表之大夫以

下以地禮神玉以兩圭有邸天子太牢

角諸侯少牢皆

尺

黝色

良耜詩  
搏牲

幣用黑日用甲

郊特牲云用日之始也按  
周初未制禮之時日猶用

戊故名詔云戊  
牛乃社于新邑

王服絺冕樂奏太簇歌應鍾舞咸池用

三獻

左傳昭二十九年蔡墨

晉太史

對魏獻子社稷云

云同句龍柱自夏以上祀之周弃亦為稷自商以來祀

之國語

祭法王為羣姓立社曰大社王自為立社曰

王社云云

郊特牲社祭土而主陰氣也天子大社必

受霜露風雨以達天地之氣云云疏社祭一歲有三仲

春命民社

令月

一也詩以社以方謂秋祭晡二也孟冬大

割祠于公社令三也 禮運祀社于國所以列地利命

降于社之謂殽地 魯語土發而社助時也 援神契

仲秋穰禾拜祭社稷 夏官量人營軍之壘舍量其軍

社之所里注社主在軍者 春官大祝大師宜於社設

軍社 左傳君以軍行祓社釁鼓祝奉以從 馬融周

禮注王者五社大社在中門之外惟松東社八里惟栢

西社九里惟栗南社七里惟梓北社六里惟槐

後漢志注尚

書逸篇曰大社惟松東社惟栢  
南社惟梓西社惟栗北社惟槐

周方社

詩甫田以我齊明與我犧羊以社以方注社后土也方迎四方氣於郊也箋云秋祭社與四方為五穀成熟報其功 雲漢祈年孔夙方社不莫

方祭四方社祭土神

周郊社

家語孔子至周歷郊社之所 公羊傳天子祭天諸侯祭土注郊所以祭天天子所祭莫重於郊土謂社也諸侯所祭莫重於社 禮運祭帝於郊所以定天位也祀

社於國所以列地利也故禮行於郊而百神受職焉禮  
行於社而百貨可極焉 中庸明乎郊社之禮治國其  
如示諸掌乎 祭法疏大社在庫門內之右小宗伯云  
右社稷王社所在書傳無文或云與大社同處王社在  
大社之西崔氏云王社在藉田王自所祭以供粢盛詩  
頌云春藉田而祈社稷是也諸侯國社亦在公宮之右  
侯社在藉田 鄭駁異義云有國及治民之大夫乃有  
社稷郊特牲疏鄭康成之說以社為五土總神稷為原

隲之神句龍稷配之案郊特牲云社祭土而主陰氣社所以神地之道禮運云命降于社之謂殺地故知社即地神稷是社之細別名曰稷聖證論王肅難鄭云禮運云祀帝於郊所以定天位祀社於國所以列地利言列地利知社非地也為鄭學者馬昭通之云地體有形不須云定位肅又難鄭云名誥用牲于郊牛二明后稷配天故二牲社于新邑牛一豕一明唯祭句龍更無配祭之人祭法及昭二十九年傳云句龍能平水土故



祀以為社不云祀以配社明知社即句龍也為鄭者通之云后稷非能與天同功惟尊祖配之故不得稱天不敢與天同牲句龍與社同功故得云祀以為社而配同牲也肅又難鄭云月令命民社鄭注云社后土也孝經注云社后土也句龍為后土既云后土則句龍也是鄭自相違為鄭者通之云句龍為后土之官其地神亦名后土白虎通云天子之社壇方五丈諸侯半之社之主蓋用石

鄭注宗伯云

案條牒論稷壇在社壇西俱北嚮營

並壇共門或曰在社壇北其用玉無文今禮用兩圭有  
卽 胡氏曰古者祭地於社猶祀天於郊也泰誓曰郊  
社不修周公祀于新邑亦先用二牛于郊後用大牢于  
社記曰天子將出類于上帝宜于社又曰郊所以明天  
道社所以明地道周禮以禋祀祀昊天上帝以血祭祭  
社稷而別無地示之位四圭舞雲門以祀天神兩圭舞  
咸池以祀地而別無祭社之說則以郊對社可知矣後世

既立社又立  
北郊失之矣

魯兩社

左傳閔二年間于兩社為公室輔注周社右亳社左兩

社之間朝廷執政所在疏魯是周之諸侯故國社謂之

周社哀四年亳社災是魯國有亳社魯外朝在庫門之

內東有亳社西有國社

疏又云雉門之外左有亳社右有周社

定六年

盟于周社亳社

公羊傳云蒲社

禮記外傳社者

五土之神稷者百穀之神

一云稷是原隰之神

明堂位曰春

社天子之祭也

郊特牲曰地載萬物天垂象取財

於地取法於天是以尊天而親地也故教民美報馬家主中雷而國主社示本也 後漢志大司農鄭玄說古者官有大功則配食其神故句龍配社棄配稷

漢社稷 公社 枌榆社 官社 官稷

高紀二年二月癸未令民除秦社稷立漢社稷

蕭何傳漢二年

何守闕中立宗廟社稷宮室

郊祀志高祖初起禱豐枌榆社徇沛

為沛公遂以十月至霸上立為漢王二年令縣為公社

李奇曰後四歲天下已定詔御史令豐治枌榆社常以

時春以羊彘祠之

鄭氏曰粉榆鄉名也社在粉榆晉灼曰粉白榆也社在豐東北十五里師

古曰以此木為社神因立名

義曰高祖里社也續志豐有粉榆亭

史記正十年春有司請

令縣常以春二月及臘祠稷以羊彘民里社各自裁以

祠元始五年莽又言社者土也稷者百穀之主王者

尊重親祭禮如宗廟詩曰乃立冢土以御田祖以祈甘

雨聖漢禮儀稍定已有官社未立官稷

臣瓚曰高帝立漢社稷禮所謂

大社也時又立官社配以夏禹所謂王社也見漢祀令而未立官稷至此始立之世祖中興不立官稷相承至

今遂於官社後立官稷以夏禹配食官社后稷配食官

稷稷種穀木

也 楮木

徐州牧歲貢五色土各一斗

紀元始三年夏

立官稷及學官注師古曰初立官稷於官社之後是為一處今更創置建於別所不相從也

後紀

章帝章和元年八月己丑遣使祠沛高原廟豐粉榆社

續志注白虎通曰人非土不立非穀不食土地廣博

不可徧敬五穀衆多不可一一而祭故封土立社示有

土也稷五穀之長故立稷而祭之也歲再祭之春求秋

報也祭以三牲重功也

天子太牢諸侯少牢

孔鼂云周祀一社一

稷漢及魏初亦一社一稷至景初中立帝社二社至于

今荀或問仲長統以社祭何神統答土神也侍中鄧義  
難之答曰郊社之次天地之序也 禮記正義鄭康成

以社為五土總神稷為原隰之神句龍稷配之天子諸

侯各有二社

祭法王立大社王社諸侯立國社侯社  
又有喪國之社春秋亳社魯宋有之

祭

法大夫以下成羣立社曰置社注云大夫不得特立社

與民族居百家以上共立一社今里社是也秦漢以來

民二十五家以上得立社

鄭志云月令命民社謂秦社  
也自秦以下民始得立社

皇侃曰天子諸侯祭社用藉田之穀大夫以下丘乘之

民共築盛 孝經援神契社者土地之主稷者五穀之  
長 詩載芟疏祭法云王為羣姓立社曰大社王自為  
立社曰王社此為百姓祈祭當主於泰社其稷與社共  
祭 甫田注社后土也方迎四方氣於郊也疏中庸云  
郊社相對郊是天則社是地后土者地之大名句龍職  
主土地故謂官為后土死以配祭 禮儀志注漢舊儀  
曰成帝五年六月始命諸官止雨朱繩縈社是後水旱  
常不和



漢雒陽社稷

紀建武二年正月壬子起高廟建社稷於雒陽志建武二年立太社稷于雒陽在宗廟之右方壇無屋有墻門而已二月八月及臘一歲三祠皆太牢具使有司祠

漢舊儀使者監祠南向立不拜

郡縣置社稷太守令長侍祠牲用羊豕

唯州所治有社無稷以其使官也古者師行有載社不

載稷也

古今注曰建武二十一年二月乙酉徙立社稷上東門內元和三年初為郡國立稷及祠社靈

星禮器也

社稷之樂

見四品樂

晉志漢至魏但太社有稷而

官社無稷故常二社一稷 通典魏明帝景初中立帝

社曹植有  
社頌

漢茅土

續志注獨斷曰天子太社封諸侯者取其土苞以白茅授之以立社其國謂之受茅土漢興唯皇子封為王者得茅土其他功臣以戶數租入為節不受茅土不立社

武帝五子傳元狩六年封三王齊受青社燕受玄社

廣陵受赤社

祭法諸侯社

禹貢徐州貢土五色注王者封五

色之土為社建諸侯則各割其方色土與之使立社  
煮以黃土苴以白茅茅取其潔黃取王者覆四方

### 漢樂公社

樂布傳景帝時復為燕相燕齊之間皆為立社號曰樂  
公社 陳平傳里中社平為宰分肉甚均 石慶傳慶

社于齊不言動民

慶為齊相齊國大  
治為立石相祠

### 晉二社

武紀太康九年三月壬辰初并二社為一十年六月庚  
子復置二社 禮志太康九年改建宗廟而社稷祠壇

俱徙乃詔曰社實一神其并二社之祀於是傳咸表曰  
祭法王社太社各有其義天子尊事宗廟故冕而親耕  
自為立社者為藉田而報者也國以人為本人以穀為  
命故又為百姓立社而祈報焉此社所以有二也謂宜  
仍舊立二社而加立帝社之稷時成粢議稱景侯論太  
社不立京都欲破鄭氏學劉寔與咸同詔曰社稷一神  
而二位衆議不同何必改作其使仍舊一如魏制其後  
摯虞奏以為祭法王為羣姓立社曰王社周禮大司徒

設其社稷之壇又曰以血祭社稷則太社也封人掌設王之社壝又有軍旅宜于社則王社也宜定新禮從二社詔從之至元帝建武元年又依洛京立二社一稷其太社之祝曰地理普施惠存無疆乃建太社保佑萬邦帝社之祝曰坤德厚載邦畿是保乃建帝社以神地道

洛京社稷在廟之右而江左又然

宋何承天有社頌

梁社稷五壇 隋親祀太社

隋志梁社稷在太廟西其初蓋晉元帝建武元年所

創有太社帝社太稷凡三壇門牆各隨其方色大同初加官社官稷並前為五壇後齊立三壇於國右隋開皇初社稷並列於含光門內之右又於國城東南七里延興門外為靈星壇韋叔夏曰魏以官社為帝社晉初或廢或置皆不言所置之處或云兩社同處崔氏皇甫氏云王社在藉田隋紀開皇三年八月戊子親祀太社

唐親祠太社 東都太社

紀武德九年正月丙子初令州縣祀社稷戊寅親祠太

社舊紀云九年二月  
戊寅親祠社稷

會要武德九年正月親祠太社

丙子詔曰吉日惟戊親祠太社率從百僚以祈五穀神  
龍元年五月乙酉詔於東都建置太社祝欽明問禮官  
博士曰周禮田主各用所宜木今太社主用石何也韋  
叔夏等四人議曰春秋傳軍行拔社書曰不用命戮于  
社社之主盖用石為之崔靈恩三禮義宗曰社神用石  
以土地所生最實故也又呂氏春秋云殷人之禮其社  
用石後魏書云天平四年太社石主遷於社宮是社主

用石古有明說周禮用所宜木謂民間之社非太社也  
云云張齊賢傳同開元十九年正月三十日詔州縣社  
惟用酒脯二十二年三月二十五日詔用牲牢天寶元  
年十月戊寅九日詔社為九土之尊稷乃五穀之長祭  
官宜加精潔其社壇側禁樵牧三載二月戊寅十四日  
詔社稷升為大祀以四時致祭初開元禮列為中祀後  
又依開元禮為中祠長慶二年正月王彥威奏牲用太  
牢太尉攝行事祭之日不坐並大祠之義請昇為大祠



唐帝社帝稷壇 先農壇

禮樂志藉田祭先農唐初為帝社亦曰藉田壇貞觀三年將親耕給事中孔穎達議曰禮天子藉田南郊今帝社乃東壇未合於古太宗曰吾方位少陽乃耕於東郊垂拱中藉田壇曰先農壇神龍元年五月祝欽明議緣田為社曰王社今曰先農失王社之義宜正名曰帝社韋叔夏張齊賢等議宜於藉田立帝社帝稷配以禹棄則先農帝社並祠叶周載芟之義欽明又議先農王社

一也更加二祀不可叔夏齊賢乃奏先農與社一神今

先農壇請改曰帝社壇於是立帝社壇又立帝稷壇於

西如太社太稷而壇不設方色以異於太社

志又云廣五丈以五

土為之者社稷壇也

開元十九年停帝稷而祀神農氏於壇上以

后稷配憲宗元和五年詔以來歲藉田太常修撰韋公

肅采開元乾元故事為先農壇於藉田高五尺廣五丈

四出陞其色青草具其儀以水旱用兵而止 通典社

稷在含光門內之右仲春秋戊日祭之

太社以大罍實醴齊著尊實盎

齊皆二山壘大稷如之及配坐邊豆皆十簋簠二  
銅三孟春祭帝社及配坐亦如之社稷牲以黑會

要神龍元年五月問禮官舊社主長尺六寸方尺七寸  
韋叔夏等議曰社主之制在禮無丈郊特牲云社祭土  
主陰氣韓詩外傳云天子太社方五丈諸侯半之五土  
數社主宜長五尺以準陰數五方二尺以準陰偶刻其  
上以象物生方其下以象地體埋半土中本末均也請  
度以古尺又問舊社稷壇四方設以方色中央數尺以  
黃土叔夏等曰韓詩外傳云天子太社廣五丈分置四

方色上冒以黃土說云象王者覆被四方請準古改造  
於是以方色飾壇四面及四陞上以黃土覆之

張齊賢傳同

祥符祭社稷禮器 壇制度儀注 元豐兩圭

有卽

祥符二年正月八日甲子詔禮院定州縣祭社稷及釋  
奠丈宣王禮器數請正配坐每坐樽二簋豆八簋簋各  
二俎三從祀籩豆二簋簋俎一圖其制摹印頒之七月  
十四日丁卯又詳定祭器祭服州縣止用公服行事十

月十日禮院定諸州祭社稷儀約開寶通禮定儀注摹

印頒之

從知白州曾世南之請

四年十月十三日壬子詔州縣社

稷壇多不如禮命禮院定高下丈尺制度頒天下依禮

修築天聖十年七月三日修太社稷壇

從王隨之言也

禮官言

按唐郊祀錄太社壇廣五丈高五尺五色土為之稷壇

在西

如社之制

社以石為主形如鍾長五尺方二尺剡上方

下培其半宮垣飾五色屋三門每門十二戟四隅飾粟

欸如廟之制中植槐其壇三分宮之一在南無屋從之

元豐七年八月二十二日己丑造兩圭有邸二以為社

稷禮神玉

舊止有  
壑玉

八年二月十六日庚辰詔州縣社壇

用石為主

尺寸廣長半  
太社之制

元祐七年三月十八日禮官請

設宮懸登歌樂政和元年六月請諸州壇飾隨方色紹

興十二年三月十八日乙巳詔臨安府建大社稷壇淳

熙六年四月常德守李燾請頒下春秋祭社稷繪畫尊

爵簋簋制度於是太常以五禮新儀及祭社稷儀注并

圖畫尊爵簋簋之制頒下十年七月詔水旱令州縣先

祈社稷

嘉祐郊社令

嘉祐元年十一月置郊社令

命石祖元

熙寧元年始主

四郊壇壝

命張伯世

紹興十九年二月始除韓彥直太

社令

祀先農儀省牲之日  
太社令帥屬除壇

周封人典祀漢太祝

令祠祀梁明堂太社令後周司社隋唐郊社令

社土也稷穀也非土不生非穀不育國始建則壇

以祀示民有命也

社者五土之神稷者五穀之

神土穀之有功於民此祀典之所當尊是以人臣有平土之功則取以配社有播穀之功則取以配稷示不忘本之義也書正義漢儒說社稷有二左傳說社祭句龍稷祭柱棄唯祭人神而已孝經說社為土神稷為穀神句龍柱棄是配食者也

隋志凡人非土不生非穀不食土穀不可偏祭故立社稷以主祀古先聖王法施於人則祀之故以句龍主社周棄主稷而配焉歲凡再祭蓋春求而



秋報列於中門之外外門之內尊而親之與先祖同也然而古今既殊禮亦異制故左社稷而右宗廟者得質之道也右社稷而左宗廟者文之道也

祀日月

王朝日者示有所尊訓人事君也王者父天而母地兄日而姊月故常以春分朝日秋分夕月況人不得事耶君子履端於始舉正於中故本二分也

炎帝祀朝日

拾遺記炎帝築圓丘以祀朝日飾瑤階以揖夜光家語高辛歷日月之生朔而迎送之堯典寅賓出日注

春分朝日漢賈誼傳三代之禮春朝朝日秋暮夕月

周朝日夕月周拜日壇

禮大宗伯以實柴祀日月星辰注實牛柴上也疏郊特牲曰郊之祭大報天而主日祭義曰配以月則郊祭并祭日月掌次朝日則張大次小次設重帟重案注春

分拜日於東門之外祭義曰周人祭日以朝及闇肆  
師立次祀用牲幣注天神日月星辰小宗伯兆四類  
注兆日於東郊兆月與風師於西郊云云典瑞王晉  
大圭執鎮圭繅藉五采五就以朝日注繅有五采文所  
以薦玉木為中幹用韋衣而畫之王朝日者示有所尊  
訓民事君也天子常春分朝日秋分夕月覲禮曰拜日  
於東門之外疏掃大圭長三尺玉笏於帶間手執鎮圭  
尺二寸王者父天母地兄日姊月既春拜日於東明秋

夕月於西 圭璧以祀日月疏若春秋分并大報天主

日配以月

玉人云圭璧五寸

司儀將合諸侯則令為壇三成

宮旁一門注天子春帥諸侯拜日於東郊則為壇於國東夏禮日於南郊則為壇於國南秋禮山川丘陵於西郊則為壇於國西冬禮月四瀆於北郊則為壇於國北既拜禮而還加方明於壇上而祀焉所以教尊尊也

覲禮天子乘龍載大旂象日月升龍降龍出拜日於東門之外反祀方明

注此謂會同以春

禮日於南門外禮月於北

門外此謂會同以夏冬禮月於北郊月六陰之精

祭義郊之祭大報天而

主日配以月夏祭其闇殷祭其陽周祭日以朝及闇祭日於壇祭月於坎以別幽明祭日於東祭月於西以別外內疏天無形體懸象著明不過日月故以日為百神之主配之以月天帝獨為壇其日月及天神等共為一壇故日得為衆神之主也祭日於壇謂春分也祭月於坎謂秋分也月為幽日為明日為陽在外月為陰在內祭日於東用朝旦之時是為外祭月於西鄉夕之時是

為內崔氏云日月有合祭之時謂郊祭天而主日配以月其禮大用牛各祭之時謂春分朝日秋分夕月其禮小故祭法用少牢今謂小司徒小祭祀奉牛牲鄭注謂玄冕所祭何得用少牢祭法禱祈之祭也崔說非郊特牲疏凡祭日月之禮崔氏云一歲有四迎氣之時祭日於東祭月於西故小宗伯云兆五帝於四郊四望四類亦如之一也春分朝日秋分夕月二也

此二祭日月各祭于一處

皆為壇所謂王宮夜明也

夏正郊天之時而主日配以月祭義云大

報天而主日配以月三也孟冬大蜡之時又祭日月月

令祈來年于天宗四也

此二祭并祭日月共在一處

其牲皆用犢若

祈禱則用少牢

祭法王宮祭日夜明祭月也注王宮

日壇王君也夜明月壇疏日神尊故其壇曰君宮月明

於夜故其壇為夜明

玉藻天子玄端而朝日於東門

之外注端當為冕玄衣之冕冕服之下朝日春分之時

也疏案宗伯實柴祀日月星辰則日月為中祀而用玄

冕者以天神尚質按魯語大采朝日少采夕月孔晁云

大采謂衮冕少采謂黼衣而用玄冕者孔氏之說非也  
書傳略說云祀上帝於南郊即春迎日於東郊彼謂孟  
春與此春分朝日別朝事儀云冕而執鎮圭帥諸侯朝  
日於東郊 魯語天子大采朝日與三公九卿祖識地  
德少采夕月與太史司載糾虔天刑注王搢大圭執鎮  
圭藻五采五就以朝日大采謂此也朝日以五采則夕  
月其三采也 周語先王朝日夕月以教民事君通  
典周制以實柴祀日月日壇曰王宮月壇曰夜明牲幣



俱色青樂同祭五帝樂禮玉以圭璧左傳日月之神  
則雪霜風雨之不時於是崇之穀梁傳雖為天子必有  
尊也貴為諸侯必有長也故天子朝日諸侯朝朔尚  
書大傳以正月朝迎日於東郊所以為萬物先而尊事  
天也宋志尚書大傳迎日之辭曰維某年月上日明  
光于上下勤施于四方旁作穆穆維予一人某敬拜迎  
日于郊

吳時陳融奏東郊頌亦行此禮

漢郊祀志四望蓋謂日月星

海也三光高而不可得親海廣大而無限界故其樂同

祀天則天文從祭地則地理從

漢修天文壇 竹宮揖日月

見郊祀類泰時 郊祀志天子始郊見泰一朝日夕月

則揖而見泰一

武帝立二十八年元鼎五年

元始祭禮祀天則天文

從 晉禮志春分祀日秋分祀月漢武帝郊泰時朝

日夕月不在東西郊旦夕常拜故魏文帝詔曰漢氏

不拜日於東郊而旦夕常於殿下東西拜日月煩褻

似家人之事非事天之道也黃初二年正月乙亥祀朝

日於東門之外

將祭必先夕  
牲其儀如郊

又違禮二分之義明帝太

和元年二月丁亥朝日於東郊八月己丑夕月於西郊

始得古禮晉因之武帝太康二年親朝日

齊何佟之議  
馬鄭用二分

盧植用  
立春

漢禮日成山

又見人神

武紀太始三年二月幸琅邪禮日成山

郊祀志作盛  
山其音同

祭之罍浮大海山稱萬歲注師古曰成山在東萊不

夜斗入海

郊祀志宣帝修武帝故事盛車服敬齊

祀之禮頗作歌詩迺祠成山於不夜萊山於黃成山祠  
日萊山祠月京師郡縣鄆則有日月祠成帝初成山萊  
山之屬皆罷地理志東萊郡不夜有成山日祠注師  
古曰齊地記云古有日夜出見於東萊故萊子立城以  
不夜為名

顧野王云初築此城  
有日夜出故名不夜

括地志不夜城在萊

州文登縣東北八十里漢不夜縣有成山祠成山在萊  
州文登縣北八十里萊山在萊州黃縣東南二十里

魏朝日夕月

見上段

元魏朝日東郊

紀太和十五年八月甲寅詔朝日以朔夕月以朏十六年二月甲午始朝日東郊

唐朝日夕月壇

志壇塙之制廣四尺高八尺者朝日之壇也為坎深三尺縱廣四丈壇於其中高一尺方廣四丈者夕月之壇也

舊志有樂章十六首貞觀中作

朝日夕月無配日以圭璧幣以青

月以圭璧幣以白大明青犢夜明白犢 通典二分朝  
日夕月於國城東西各用方色犢 陸贄東郊朝日賦  
載青旂儼翠華 柳宗元朝日說曰古者旦見曰朝暮  
見曰夕 楚辭九歌有東君日神也漢志亦有東君

隋志後周以春分朝日於國東門外為壇如其郊用特  
牲青幣青圭有邸秋分夕月於國西門外為壇於坎中  
方四丈深四尺燔燎禮如朝日隋開皇初於國東春明  
門外為壇以春分朝日於國西開遠門外為坎深三尺

廣四丈為壇於坎中高一尺廣四尺以秋分夕月

元豐朝日夕月壇

見祠壇類 景德三年撰朝日三曲

降神送神高安奠玉幣酌獻嘉

安夕月三曲

紹興十曲

升殿正安捧俎豐安亞終獻文安送神禮安

義御寅賓 載嚴大采示民有尊揚光下燭煜燐東

門 肝鬯是屆禮神以兄 義和駕兮其容杲杲

大采黜冕乃昭其文 珪奠春舒鍾歌曉溢 玄端

肅事紫幄興祥 扶光若英合璧重輪 載嚴婦事

用答陰靈 光凝冕服氣肅環珮 坎祀貽則郊禋展  
敬 璧薦登光金歌動映 有齊斯旨有牲斯碩 織  
阿案晷

星祠

爾雅祭星曰布 祭法幽宗祭星

宗當為崇

注幽崇謂星

壇也星以昏始見疏星至夜而出故曰幽為營域而  
祭之故曰幽崇

舜五星祠



拾遺記虞舜在位十年有五老遊於國都舜以師道尊之言則及造化之始舜禪於禹五老去不知所從舜乃置五星之祠以祭之其夜有五長星出薰風四起連珠合璧祥應備焉

### 周祭靈星

通典周制仲秋之月祭靈星於國之東南

就歲星之位

絲

衣繹賓尸高子曰靈星之尸

正義張晏曰農祥

周語辰馬農

祥也后稷所經緯

晉語辰以成善后稷是相

周書作雒農星皆與

食

周壽星祠

通典周制秋分日享壽星于南郊

注南極老人星祠以祈福壽

又曰

周立壽星祠於下杜亳時奉焉

漢志秦於杜亳有五

杜

史記作三社

主之祠壽星祠各以歲時奉祠

史記正義角亢在辰為壽

星三月之時萬物始生春氣布養各盡其性故壽爾雅壽星角亢也與老人別星

周祀司中司命

詳見後四類

大宗伯以實柴祀日月星辰以禋燎祀司中司命風師

雨師注鄭司農云司中三能三階司命文星宮星玄謂  
司中司命文星第五第四星或曰中能上能風師箕雨  
師畢正義實柴無玉有牲幣禋燎止有牲武陵太守星  
傳三台一名天柱上台司命中台司中下台司祿楚辭九歌  
有大少司命上台文昌第四星故有兩司命春秋緯月離于箕風揚沙箕風師也  
詩云月離于畢俾滂沱矣畢雨師也

周祭司民司祿

見後四類

漢靈星祠

郊祀志高祖二年冬擊項籍還後四歲天下已定詔安

置祀官其後二歲

即高祖八年也

或言曰周興而邑

一有卽字

立后

稷之祠至今血食天下於是高祖制詔御史其令天下

立靈星祠

注張晏曰龍星左角曰天田則農祥也晨

服虔云祠角星以后稷配食

常

以歲時祠以牛孝武元封三年夏旱迺下詔令天下尊

祠靈星

史記赤星寬舒之祠官歲時行禮正義赤星即靈星祠龍左角色赤漢舊儀云五年脩復周

家舊祠祀后稷於東南為民祈農報厥功

後祭祀志漢興八年有言周興

而邑立后稷之祀於是高帝令天下立靈星祠

注三輔故事長

安城東十里有靈星祠廟記同

言祀后稷而謂之靈星者以后稷又配

食星也舊說星謂天田星也一曰龍左角為天田官主

穀

注張晏曰農祥農見而祭也

祀用壬辰位祠之士為水辰為龍就

其類也牲用大牢縣邑令長侍祠

注漢舊儀曰古時歲再祠靈星春秋用大

牢禮也

史記正義辰之神為靈星故以壬辰日祠於東南

舞者用童男十六人

注服

虔應劭曰即古之二羽也

舞者象教田初為芟除次耕種芸耨驅

爵及獲刈春籩之形象其功也

注古今注曰元和三年初為郡國立稷及祀社

靈星禮器 通典周仲秋辰日祭靈星於國之東南王者所以復祭靈星者為人祈時以種五穀故別報其功

唐六典立秋後辰日祀靈星於國城東南  
晉志江左以來靈星配饗南郊不復特置

長安志

靈星壇在萬年縣南一十五里啟夏門外 嵩高山記

孝武遊登五岳尊祠靈星移祠置岳南築作殿壇立圓石闕 論衡今靈星秋之雩也

漢雍諸星祠

志雍有日月參辰南北斗熒惑太白歲星填星辰星二十八宿風伯雨師四海九臣十四臣之屬百有餘廟

史記

正義漢舊儀祭參辰星於池陽谷口夾道左右為壇文王都豐武王都鎬二都有昭明祠河圖云熒惑星散為昭

明春秋傳昭明起有德如太白

成帝時衡譚條奏長安祠凡六百八十

三所其二百八十所應禮奉祠如故餘四百七十五所不應禮皆罷奏可雍舊祠三百三所惟山川諸星十五所為應禮云地理志扶風舊有五時太昊黃帝以下祠三百三所

### 漢歲星祠

志宣帝神爵元年立歲星辰星太白熒惑南斗祠于長

安城旁

漢南郊祀老人星

又見祀高祺

後禮儀志仲秋之月縣道皆按戶比民年始七十者授玉杖鋪之糜粥八九十禮有加賜玉杖長尺端以鳩鳥為飾鳩不噎之鳥也祀老人星於國都南郊老人星

廟

通典周立壽星祠于下杜亳漢志亳有壽星祠各以歲時奉祀

郊祀志元豐二年郊

雍還祠太一贊饗曰壽星仍出淵耀光明

索隱曰老人星也

晉天文志老人一星在弧南一曰南極見於丙沒於丁見



則治安以秋分候之南郊

漢城南壇祠心星

後禮儀志季秋祠心星於城南壇心星廟

晉志引漢儀云心

三星天王正位也

晉祠靈星

北史劉芳傳靈星本非禮事兆自漢初專為祈田常隸郡縣晉祠令云郡縣國祠社稷先農縣又祠靈星

隋司中司命司祿壇

志陳制令太史以二月八日於庭中以太牢祠老人星  
兼祠天皇大帝天一太一日月五星鉤陳北極北斗三  
台二十八宿丈人星子孫星四十六坐 隋制於國城  
西北十里亥地為司中司命司祿三壇同壇祀以立冬  
後亥國城東北七里通化門外為風師壇祀以立春後  
丑國城西南八里金光門外為雨師壇祀以立夏後申  
壇皆三尺牲以一少牢 舊禮兆風師於西方司中司  
命於南郊雨師於北郊開皇三年四月皇帝親祀雨師  
唐從祀星辰圖

六典見郊祀春祀青帝歲星東方三辰七宿並從祀  
夏祀赤帝熒惑南方三辰七宿從祀季夏祀黃帝鎮星  
從祀秋祀白帝太白西方三辰七宿從祀冬祀黑帝辰  
星北方三辰七宿從祀 許子儒傳初太尉無忌等議  
祠令及禮用鄭玄說以昊天帝當北辰耀魄寶郊明堂  
當太微五帝唐家祀圓丘太史所上圖昊天上帝外自  
有北辰李淳風曰昊天上帝位于壇北辰斗列第二坡  
與緯書駁異司馬天官書太微宮五精之神五星所奉

有人主象故名曰帝猶房心有天王象安得盡為天乎  
羣星從坐錯落侈哆

唐靈星祠

通典立秋後辰日祀靈星祝曰九穀方成三時不害馮  
茲多祐介其農穡開元祀於國城東南天寶四載

升中祠

上元元年四月停貞元六年二月十七日  
甲申太常卿崔縱奏勅靈星司中司命等

壇准開元  
禮配饗

玄宗天寶三載二月戊寅升日月五

星為大祀諸星為中祀 隋開皇初於國城東南

七里延興門外為靈星壇立秋後辰祠以一少牢

唐祀壽星

詳見壇壝門

會要開元二十四年七月己巳置壽星壇以千秋節日修祠祭老人星及角亢七宿著之常式

明皇生於八月以仲秋日月會

于壽星置壇用千秋節日祭壽星賦

爾雅壽星角亢也注列宿之長故曰壽星

通典隋令太史以二月八日以太牢祠老人星兼祀天皇大帝等四十六坐

唐五星壇

玄宗天寶十四載三月時雨未降二十五日令給事中  
王維等分祭五星壇

景德享壽星 紹興享壽星

見祠壇類 志秋分享壽星 王欽若傳請置先蠶井  
壽星祠升天皇北極帝座於郊壇第一龕增執法孫星  
位所著書有列宿萬靈朝真圖 祥符二年九月翰  
林天文邢中和言景德中周伯星出亢宿之下天文

志角亢為太山之根符上封之應望於親郊日特置  
周伯星於亢宿間禮官司天監議周伯星出氐三度  
亢氐相去不遠並鄭分兗州壽星之次望設於氐宿  
之間從之

皇祐司中壽星靈星壇

志司中壇方丈三尺壽星壇方丈八尺靈星壇東西丈  
三尺南北丈二尺馬祭壇在城西北高三尺五寸東西  
丈五尺南北丈四尺皇祐定如唐司中周二十五步壽

星靈星周八步四尺馬祭周九步皆高三尺

皇祐汴河祭星

四年春二月丁亥詔每歲汴口祭河兼祠十七星初  
司天監靈臺郎王太明言汴河之祭不及星詔司天詳  
定汴河口祭星自此始箕斗奎東井天江咸池積水天  
淵天潢水位水府四瀆九坎天船王良羅堰

凡十七星

禋祭

古之王者以歲事成熟搜索羣神而報祭之而謂之



大蜡仁之至義之盡也又為臘祭先祖五祀因屬民  
飲酒而勞賜農夫以休息之

伊耆氏蜡 八蜡

郊特牲天子大蜡八

所祭有八神

伊耆氏始為蜡

古天子號疏皇氏云

神農釋文或云帝堯

蜡者索也歲十二月合聚萬物而索饗之也

建亥之月蜡之祭主先嗇

神農

而祭司嗇也

后稷

祭百種以報嗇

也饗農

田畯

及郵表畷

田畯

督約百姓於井間

詩曰下國

畷郵

禽獸

猛獸

仁

之至義之盡也迎貓虎而祭之

迎其神也

祭坊與水庸

溝也

事

也曰土反其宅水歸其壑昆蟲毋作草木歸其澤

此蜡祝辭

也黃衣黃冠而祭息田夫也

謂既蜡臘先祖五祀

大羅氏天子之

掌鳥獸者也諸侯貢屬焉草笠而至尊野服也羅氏致

鹿與女以戒諸侯八蜡以記四方

先嗇一司嗇二農三郵表畷四貓虎五坊

六水庸七昆蟲八疏鄭數八神約上文也王肅分貓虎為二無昆蟲

順成之方其蜡乃通

既蜡而收民息已君子不興功

息民與蜡異

周禮伊耆氏

共杖咸盖蜡以息老故共杖咸者以名官明堂位土

鼓鞀籥伊耆氏之樂

夏清祀

嘉平

殷嘉平

周蜡

秦臘

禮運仲尼與於蜡賓釋文夏曰清祀殷曰嘉平周曰蜡

秦曰臘字林作蜡

疏清祀以清潔祭祀嘉平嘉善也平成也以歲終方物善成就而報功蜡

臘義見下

明堂位秋省而遂大蜡天子之祭也周禮籥

章國祭蜡歛豳頌擊土鼓以息老物

通典用六奏之樂

注萬物

助天成歲事至是為其老而勞乃祀而老息之於是國

亦養老焉月令孟冬勞農以休息之是也

隋志周法以歲十二月建

亥之月也

大司樂凡六樂者六變而致羽羸鱗毛介象物

及川澤山林丘陵墳衍土示天神注此謂大蜡索鬼神而致百物六奏樂而禮畢東方之祭用太簇姑洗南用蕤賓西用夷則無射北用黃鍾為均焉每奏有所感

羅氏蜡則作羅襦注致鹿與女以戒諸侯 大宗伯以

鬯辜祭四方百物注謂蜡祭 黨正國索鬼神而祭祀

則屬民飲酒于序注謂歲十二月大蜡之時

建亥之月也

左傳虞不臘矣疏月令孟冬臘門閭及先祖五祀臘之

見於傳記者唯月令與此二文而已秦本紀惠王十二

年初臘始皇三十一年更改臘曰嘉平蔡邕獨斷云臘者歲終大祭縱吏民宴飲非迎氣故但送不迎應劭風俗通云案禮傳夏曰嘉平殷曰清祀周曰大蜡漢改曰臘臘者獵也曰獵取獸祭先祖也此言虞不臘明當時有臘祭周時臘與大蜡各為一祭漢改曰臘不蜡而為臘耳

說文冬至後三戌臘祭百神 高堂隆議曰王者各以其行之終而臘水以辰火以戌木以未金以

丑土以辰

周顯王四十三年秦初臘按春秋時已稱虞不臘非

始於秦也始皇更名臘曰嘉平亦復用殷之舊名也  
周蜡於十有二月秦臘於孟冬皆建亥之月也蜡以  
息老物臘以息民 柳宗元有稽說

郊特牲云云既蜡而收民息已故既蜡君子不興功注  
息民與蜡異則黃衣黃冠而祭為臘必矣疏先蜡後息  
民是息民為臘與蜡異也上文黃衣黃冠在蜡祭之下  
故知是臘也月令臘在祈天宗之下但不知臘與蜡祭  
相去幾日准隋禮及今禮皆蜡之後日 月令孟冬祈

來年於天宗大割祠於公社及門閭臘先祖五祀注此  
周禮所謂蜡也疏此等之祭總謂之蜡若細別言之天  
宗公社門閭謂之蜡其祭則皮弁素服葛帶榛杖其臘  
先祖五祀謂之息民之祭其服則黃衣黃冠鄭注郊特  
牲云息民與蜡異也黨正飲酒在蜡祭之後此大飲在  
蜡祭之前屬民飲酒在後勞農也若天子諸侯羣臣大  
飲在蜡祭之前凡蜡皆在建亥之月而皇氏以為夏殷  
蜡各在己之歲終蔡邕云夏曰清祀殷曰嘉平周曰蜡

秦曰臘案左傳云云是周亦有臘名也詩甫田農夫  
之慶箋謂大蜡勞農以休息之正義郊特牲曰天子大  
蜡八歲十有二月合聚萬物而索饗之是說大蜡之祭  
也月令孟冬臘門閭及先祖五祀勞農以休息之是說  
休息之事也郊特牲蜡祭之下又曰黃衣黃冠而祭息  
田夫注云既蜡臘先祖五祀於是勞農以休息之是臘  
即次蜡之後與蜡異也

月令之臘祭與特  
牲息田夫為一

雜記云子貢

觀於蜡曰一國之人皆若狂是恣民大飲也以歲豐陽



功畢入而特聽之故謂之慶賜勞息漢家每有國慶而賜民大酺亦此義也

鄉飲酒義疏大蜡祭黨中於學飲酒子貢觀蜡是也

### 周祈年田祖

禮齋章國祈年於田祖歛豳雅擊土鼓以樂田畯注田祖始耕田者謂神農詩甫田琴瑟擊鼓以御田祖箋設樂以迎祭先嗇謂郊後始耕也周禮祈年田祖大田來方禋祀以其騂黑箋成王之來則又禋祀四方之神祈報焉黃冠野服駿奔皇皇自古有年神其降康

漢臘賜

何敞傳元和中奏記宋由曰臘賜自郎官以上公卿王侯以下至於空竭帑藏損耗國資注漢官儀臘賜大將軍三公錢各二十萬牛肉二百斤粳米二百斛特進侯十五萬卿十萬校尉五萬尚書三萬侍中將大夫各二萬千石六百石各七十虎賁羽林郎二人共三千以為祀門戶直 禮儀志季冬之月星迴歲終陰陽以交勞農大享臘葦戟桃杖以賜公卿將軍特侯諸侯注漢官

名秩曰大將軍三公臘賜錢各三十萬牛肉二百斤粳米二百斛特侯十五萬卿十萬校尉五萬尚書丞郎各萬五千千石六百石各七千侍御史謁者議郎尚書令各五千郎官蘭臺令史三千中黃門羽林虎賁士二人共三千以為當祠門戶直各隨多少受也 東觀記每臘詔賜博士人一羊甄字取瘦者 風俗通以臘祭夕飾挑人懸葦索畫虎於門以禦凶 東京賦注 月令孟冬大飲烝注十月農功畢天子諸侯與其羣

臣飲酒於太學以正齒位今天子以燕禮郡國以鄉飲酒禮代之詩云躋彼公堂稱彼兕觥是頌大飲之詩

天子乃祈來年于天宗大割祠于公社及門閭臘先祖五祀注周禮蜡祭也臘以田獵所得禽祭也勞農以休息之注黨正屬民飲酒是也東方朔傳伏日詔賜從官肉

唐蜡祭百神

志蜡祭百神大明夜明在壇上神農伊耆各在其壇上

后稷在東五官田峻各在其方五星十二次二十八宿五

方之岳鎮海瀆等各在方之壇龍麟至於菟猫各在其

方壇之後

志又云高尺廣丈蜡壇也

通典貞觀十一年房玄齡等

議曰按月令蜡法惟祭天宗近代蜡五天帝人帝五地

極皆非古典今並除之季冬寅日蜡祭百神于南郊凡

百八十七座明日又祭社稷于社宮開元中制儀季冬

臘日蜡百神于南郊之壇

後周用夏后之時行姬氏

之禮

孟冬丁亥

隋開皇四年十一月詔以十二月為臘

建隆禋祭 元豐禋壇

建隆四年

即乾德元年癸亥

六月二十三日和峴言禋者臘之

別名漢火行戌日為臘唐土德貞觀之際以寅禋百神

卯祭社宮辰臘宗廟開元定禮三祭皆以臘辰應土德

也聖朝火德臘宜以戌而前七日辛卯行禋禮恐未合

宜於是如開元禮臘日禋百神祀社稷享宗廟皆用戌

日天聖三年十一月二十二日庚子知禮院陳詒言禋

祭一百九十二位祀文惟載一百八十二位而闕五方

田畷郵表畷十位下禮官議曰后稷祝文已云爰及田  
畷其五方神祝文請增郵表畷郊祀正辭錄司天監神  
位圖虎為於菟蓋避唐諱請改於菟為虎從之元豐六  
年正月癸未詳定禮文所言歷代禋祭在南郊為一壇  
唯周隋四郊之兆合禮請四郊各為一壇以祀其方之  
神先期司農言不順成之方不修報祀又月令以禋與  
息民為二祭請息民祭在禋後奏可紹興十九年五月  
乙酉詔定禋祭

從戶部郎周莊仲之言也

乾道四年十一月二十七

日禮官王淪等言東西禋備登歌三獻而南北方正配  
從祀一奠而已請如中祀儀式從之

皇祐禋壇

志臘日禋百神壇高四尺東西七步二尺南北六步四  
尺皇祐定壇高八尺廣四丈

紹興臘饗

二十六年十二月戊戌臘饗太廟

罷朔祭

以禮官援淳化

故事有請也明年六月戊午定冬饗祭功臣臘饗祭七



祀祫饗燕之

用太常博士張庭實請也

隋志蜡者索也古之

君子使人必報之故周法以歲十二月合聚萬物而索饗之仁之至義之盡也其祭法四方各自祭之君不成之方則闕而不祭

### 禘祀

王者以高辛氏有嘉祥故立高禘祀之以祈子

鄭康成謂由高辛氏有吞鳥之異故稱高禘祀之以配帝蔡邕謂高禘祀名高猶尊也禘猶禘也吉事先見之象詳見下

高辛氏郊禩

詩生民克禋克祀以弗無子注云無子求有子古者必立郊禩焉玄鳥至之日以太牢祠于郊禩天子親往后妃率九嬪御乃禮天子所御帶以弓韠授以弓矢于郊禩之前

疏祭天用太牢者以兼祭先禩之神異於常郊蓋祭

天而以先禩配之

箋禋祀上帝於郊禩

疏云后稷未生之前已有郊禩之祀

玄鳥天命玄鳥降而生商注春分玄鳥降湯之先祖有娥氏女簡狄配高辛氏帝率與之祈于

郊禘而生契故本其為天所命以玄鳥至而生焉  
疏大戴禮帝係篇說帝嚳卜其四妃之子皆有天  
下月令疏鄭義稷契當堯時案命歷序云帝嚳  
傳十世則稷契不為帝嚳之子是後世子孫之子鄭注  
生民云姜嫄高辛氏之世妃則簡狄亦後世之妃此立  
為禘神者是簡狄之夫不得為帝嚳祭高禘是祭天故  
生民傳云從於帝而見于天高禘為配祭之人祭天特  
牲此用太牢者此謂配祭之人也

生民疏姜嫄得祈郊  
禘者是二王之後得

祭天也毛以帝為高辛氏帝親行禋祀姜嫄從於帝而往見於天鄭以帝為上帝即蒼帝靈威仰也長發箋云帝黑帝以下有玄王故言黑帝

### 周祠高禘

月令仲春玄鳥至至之日以太牢祠于高禘天子親往  
后妃帥九嬪御乃禮天子所御帶以弓韞授以弓矢于  
高禘之前注玄鳥燕也燕以施生時來巢人堂宇而孕  
乳嫁娶之象也媒氏之官以為候高辛氏之世玄鳥遺  
卵娥簡吞之生契後王以為媒官嘉祥而立其祠變媒

言禡神之也御謂從往侍祠天子所御謂令有娠者於  
祠大祝酌酒飲於高禡之庭以神惠顯之也帶以弓韜  
授以弓矢求男之祥也王居明堂禮曰帶以弓韜禮之  
禡下其子必得天材疏逸禮篇名禡在壇上御者在下  
故云禡下高辛氏之世有吞鳥之異是為禡官嘉祥中  
契握云玄鳥翔水遺卵城簡狄吞之生契詩  
疏云毛氏不信讖緯以天無命鳥生人之理後王立  
高辛為禡神蔡邕以為禡神高辛已前舊有高者尊也  
生民玄鳥毛傳曰姜嫄從帝祠郊禡簡狄從帝祈郊禡

則前此矣鄭志焦喬荅王權云先契之時必自有媒氏  
祓除之祀位在南郊則契已前祭天南郊以先媒配謂  
之郊禡後王即以高辛立為禡神以配天其古昔先禡  
則廢矣

尊貴先禡  
當是伏羲

續漢志注月令玄鳥至之日以太

牢祠月令章句曰高猶尊也禡猶媒也吉事先見之象  
蓋為人求子孫之祀玄鳥感陽而至其來主為孕乳蕃  
滋故重其至日因以用事契母簡狄蓋以有事高禡而  
生契焉故詩曰天命玄鳥降而生商鄭玄謂後王以禡

官嘉祥而立其祠盧植謂玄鳥至時陰陽中萬物生於是  
以三牲請子於高禪之神居明顯之處故謂之高因  
其求子故謂之禪以古者有媒氏之官因以為神通  
典周制月令仲春玄鳥至之日以太牢祠高禪詩閔  
宮有恤實實枚枚注孟仲子曰是禪宮也疏蓋以姜嫄  
祈郊禪而生后稷故名姜嫄之廟為禪宮

漢禪祝

枚皐傳武帝春秋二十九乃得皇子羣臣喜皐與東方

朔作皇太子生賦及立皇子禋祝受詔所為皆不從故

事重皇子也

元朔元年春太子據生

注師古曰高禋求子之神也

武帝晚得太子喜而立此禋祠而令臯作祭祀之文

戾太子傳上年二十九乃得太子甚喜為立禋使東方

朔枚臯作禋祝注禋之祝辭東方朔傳朔之文辭有

皇太子生禋賦晉元康中高禋壇上石破詔問出何

經典東晉答曰漢武晚得太子始為立高禋之祠高禋

者人之先也故立石為主祠以太牢

許慎曰山陽人以石為主



漢城南高禰廟

後禮儀志仲春之月立高禰祠于城南祀以特牲 晉

禮志漢儀云

同上

通典謂武帝立後漢因之 禰祀祓

無子始見於詩太牢以祠禰復著於月令漢舉朔亦為  
皇子禰祝然則尚矣

晉禰壇

禮志元康時洛陽猶有高禰壇百姓祠其旁或謂之落  
星 隋志晉惠帝元康六年禰壇石中破為二詔問石

毀今應復不博士議禮無高禩置石之文東哲議以石  
在壇上蓋主道也宜埋而更造後得高堂隆故事魏青  
龍中造立此石詔更鐫石令如舊置壇上埋破石入地  
一丈案梁太廟北門內道西有石如竹葉小屋覆之宋  
元嘉中修廟所得陸澄以為孝武時郊禩之石然則江  
左亦有此禮後齊為壇於南郊傍廣輪二十六尺高九  
尺四陛三壝春分親帥六宮祀青帝於壇以太昊配而  
祀高禩之神以祈子禮用青珪束帛牲共以一太牢隋

制祀於南郊壇牲用太牢一  
隋經籍志宋太始祭高禘歌辭十一卷

唐祀高禘

通典大唐月令以仲春玄鳥至之日以太牢祀高禘天

子親往

月令經文及注不言有壇廟

詩生民疏祀天而以先禘配

之義如后土祀以為社由高辛有嘉祥故稱高禘

景祐高禘壇 頌 報祠高禘

景祐四年二月二日

舊編云三年二月

殿中侍御史張奎言陛

下春秋鼎盛未有皇嗣謹按月令仲春燕至之日以太  
牢祀于高禘天子親往后妃率九嬪御乃禮天子所御  
帶以弓韣授以弓矢于高禘之前此先王求嗣之祭願  
勅有司準舊儀詔有司詳定庚戌禮官以為詩月令雖  
可執據然周官所載獨闕其文則成康之際似廢而不  
講月令本秦呂不韋所集疑此乃夏商所行班固郊祀  
志言漢家祠祭最悉不及禘祀獨枚舉傳言皇子禘祝  
則武帝乃一時權祭非經也後漢至江左槩見其事而

儀典委曲不可周知且推驗歷代祭享樂章無高禩歌  
辭則當時所祀似禮之細者惟高齊禩祠最顯然出於  
草創儀章駁雜妃嬪參享黷而不蠲恐不足以爲後世  
法唐明皇因舊月令特存其事又開元定禮已復不著  
陛下垂采下議圖復舊章然高禩之祠湮晦已久必欲  
復之亦應參准前言允愜今事謂當築壇於南郊春分  
之日以祀青帝本詩克禋以祓之義也配以伏羲帝嚳  
羲本始嚳著祥也以禩神從祀報古爲禩之先也以青

石為主依漢晉隋之舊也牲用太牢樂以升歌儀視先蠶使有司攝事祝版所載具言天子求嗣之意乃以弓矢弓韞置于禋神之前祀訖奉弓矢等并胙若酒進內後宮以禮所御使齊戒受之以應求男之祥仍每歲孟春令有司申請祭之與否聽詔旨命曰特祀不為常典詔可庚戌七月太常禮院言準詔以今年春分遣官致祭其壇制高九尺周廣二丈六尺四出陛陛廣五尺設三墻墻別二十五步主用青石其長三尺八寸

用木生  
成之數

形準廟社主植壇上  
稍北露其首三寸

玉用青玉幣色從之牲用牛一羊

一豕一

如盧植  
舊說

樂章祀儀並準祀青帝樽器神坐如句

芒唯有司攝行事受福不飲為異內侍祀前一日奏請

皇后宿齋於別寢兩宮嬪從焉從之是歲春分遣官致

祭如儀壇在南薰門外東直郊壇四百步

郊壇  
西南

三月已

卯司封外郎賈昌朝太常博士梁適王平史館檢討王

洙各獻祀高祺賦頌賜勅書獎諭

二月乙丑宮中置  
赤帝像以祈嗣

寶

元二年八月甲戌皇子生

先是見赤蛇出於  
殿墀神光照庭

辛巳二十

一日命參政王巖以太牢報祠高禩準春分祀儀唯不設弓韉弓矢康定二年正月二十二日壬申詔著為常祀遣兩制官攝事二月十三日禮官言既為報祀請不設弓韉慶厯三年五月太常博士余靖言聖嗣未廣請仍用弓韉弓矢以祈嘉祥皇祐三年九月四日詔徙爽壇之地四年六月十四日徙郊壇東南奉先寺同知禮院張師中言其卑陋保章正皇甫定等請徙於圓丘之東鎮安軍文學鄭孝先謂宜在東方長男之位禮官司



天監詳定嘉祐二年五月甲申九日徙壇於南郊壇東

擇高輿地改築

紀慶厯元年正月壬申詔歲以春分祠高禩

即康定二年

李絢傳仁宗未有繼嗣絢因奉祠高禩還奏

賦大指言王者遠嬖寵近柔良則神降之福子孫繁衍  
帝嘉納

### 元豐高禩壇

熙寧二年十一月七年六月九年十二月皇子生以太  
牢報祀高禩如春分儀不設弓韉弓矢五年閏七月已

酉判太常章衡請遵故事祀禋飲福受胙以應求男之

祥上曰帝王子孫自有天命元豐四年十月九日

一云二年

八月天章待制羅拯言禋壇廣二丈六尺上設神位三

庌隘不足以行禮下太常議禮官言禋祠以青帝為主

請如青帝壇廣四丈高八尺

祀儀禋壇四丈

又請下詳定禮丈

所講求制度乃言詩克禋克祀乃郊禋祀天以高禋配於郊謂之郊今禋壇祀青帝於南郊以伏羲高辛並配又於壇下設高禋之位殊為爽誤請準古郊禋改祀上

帝以高禪配祀以太牢其位在國南以石為主畧放南郊為壇而圓以青帝壇制增築之詔典禮依舊壇制如太常奏元祐八年正月十四日太常奏祀禪政和二年四月二十九日詔以伏羲高辛配簡狄姜嫄從祀

詔興高禪壇 親祠

元年十一月八日太常少卿趙子畫請來春祀高禪奏可二年二月二十三日禮官上春分行禮飲福受胙儀注三年正月二十四日博士趙需請宸翰製祝辭以代

親祠十二年十二月二十日博士劉嶠請講求禋壇方

位制度禮官請建於行宮東南

翼地

城外十六年六月二

十七日乙丑建高禋壇

在嘉會門外南四里龍華寺

從御史王鉉言

也

鉉請一新壇宇取姜嫄從帝見於天之義月令天子親往之文法駕臨祠以獲詵詵之福既而禮官請改

築于郊壇之東以符一索得男之象飲祠受胙如景祐之儀奏可

九月十五日有司請

舉行景祐故事祗祓休饗祈天錫羨禮官言徽宗修親

祠之制具載新儀十七年二月三日上親祠儀注

上服通天

絳紗乘輦詣壇大次降輦入次服袞冕執大圭奏儀安嘉安景安之樂帝臨降康之舞甲辰以太師檜為親祠

使乙巳十三日上親祠青帝于東郊以伏羲高辛配

晉安郡王亞獻 恩平郡王終獻祀簡狄姜嫄于壇下牲用太牢王

用青幣放其玉之色樂舞如南郊之制禮畢御端

誠殿受賀十七日有司奏築壇之所有瑞氣之應

修壇之日有六鶴之祥二十二年三月己未

二十四日

校書郎董德元請高禋與青帝分為二壇禮官請

如舊制

樂曲十四降神用高安升壇用正安奠玉幣用嘉安捧俎用豐安青帝酌獻用祐安亞終

獻用文安送神用理安

東方作祝漢美可尋南郊建壇齊

制甚陋 展青幣以奠燎 眡先蠶而登歌 稽周

官考呂令 惟昔高辛 敏歆肇祀 娥嫫肇國 孕商

毓周 在漢六世 置壇于南 前星標瑞 侍臣獻祝 東

都 迪儀仲春 講祠特牲 謹物城南 辨方載在 青編


蕩人耳目 生民之什 朔臯之詞 朔賦邕儀

惟禱之神 主用青石 祀崇青帝 義譽類從 樂用升

歌 儀視先蠶 玄鳥司分 命官攝祠 夢噩協兆 吹銅

侑 酥休光 靈颺輝耀 清穆以告 震夙之喜 紺髮髮如豐

角淵如蓋五緯儲英九潢毓粹以啟暉潤之美 神其  
醉止介我蕃釐乃占吉夢維熊維羆



玉海卷九十九